

JUAN REMBICUACHIA JESUS RECOCUER RESENDAR SAN JUAN

Tūpa Ñehe oyeapo ava

¹⁻² Jesús yipisuive ité Tūpa Ñehe seci. Ahe oicove mbahe apoēhi viteseve Tūpa rese. Esepia, ahe niha Tūpa seci. ³ Ipipe avei Tūpa opacatu mbahe oime vahe oyapo; ndipoi eté mbahe sembiapoēhi. ⁴ Jesús niha vireco tecovesa apirēhi vahe oyese. Ahe tecovesa tesapesa nungar seci opacatu ava upe. ⁵ Ahe tesapesa omboyecua tecocuer supi eté vahe pītumimbi nungar mbahe naporai vahe aposar pāhuve. Ahe mbahe tēi aposar rumo ndoicatu eté secopi yuvireco.

⁶ Oime mbia Tūpa remimbou. Ahe Juan serer vahe. ⁷ Ahe rumo ou co tesapesa cua uca āgua 'toviroya opacatu ava yuvireco' ohesave. ⁸ Ahe rumo ndahei eté tesapesa; imombehusar tēi rumo seci. ⁹ Co tesapesa supi eté vahe osesape opacatu ava. Ahe ou ité co ivi pipe.

¹⁰ Yepe tie ipipe yapopri opacatu ava viña, sembiapo rumo ndoicuai co ivi pipe secoise yuvireco. ¹¹ Supi eté ouse güecuave, secua pendar ae rumo ndoipisii yuvireco. ¹² Opacatu rumo acoi oipisi vahe seroyasave yuvireco, ahe chupe omondo ñecuñarosa Tūpa rahir seco āgua yuvireco. ¹³ Ndahei rumo co ivi pipendar rahir nungar que oha vahe ambuae ava remimbotar pipe tēi. Ahe rumo Tūpa rahir ité yuvirecoi.

¹⁴ Ipare ahe Tūpa Ñehe, oyeapo ava, oicove yande pāhuve co ivi pipe oporoaisusave mbahe supi eté vahe aposa pipe. Iyavei orosepia ité seco porañetesa. Co seco porañetesa oipisi vahe Vu sui Tahir ñepepe vahe güeco

pipe. ¹⁵ Juan niha oñehe sese ava upe aipo ehi: “Co uve niha acoi aipo ahe vahe cuese: ‘Acoi ou vaheṛã che raquicuei, ahe ivate catu vahe che sui. Esepia, yipive ité secoi che yesuēhi viteseve’ ahe” ehi.

¹⁶ Esepia, opacatu ité yaipisiño iporovasasa tuvichá vahe ombouño vahe ité yandeu ari yacatu rupi yepi.

¹⁷ Mborocuita yaipisi Moisés sui; porovasasa rumo iyavei mbahe supi eté vahe, ahe güeru Jesucristo yandeu.

¹⁸ Ndipoi eté ava osepia vahe Tūpa; Tahir ñepei vahe, secoi vahe ité ipiri, ahe oicua uca yandeu.

Juan Oporoãpiramo vahe oñehe Jesucristo rese

¹⁹ Judío rereciar guasu tecua Jerusalén pendar oyocuai pahi eta iyavei ipitiviisareta imondo Juan uve ‘¿Ava vo nde? tehi yuvireco chupe’ oyapave icua ägua. ²⁰ Ahe rumo oyemombehu ité aipo ehi:

—Che ndahei eté Poropĩsirosar aico —ehi.

²¹ Evocoyase oporandu iri yuvireco:

—¿Ava ité vo nde? ¿Nde tie Elías ereico? —ehi.

—Ndahei eté che ahe aico —ehi.

Evocoyase,

—¿Nde tie acoi Tūpa ñehe mombehusar ou vaheṛã? —ehi yuvireco chupe.

—Aní eté —ehi.

²² —¿Ava rutei vo evocoyase nde? ¡Emombehu oreu ore oromombehu vaheṛã ore mbousar uve! ¿Mbahe ité vo eremombehura ndeyesuindar oreu? —ehi yuvireco chupe.

²³ —Che aico oñehe vahe ivi iporupirēhisa rupi aipo ahe: ‘Pemoingatu pe recocuer yande Yar yepotase nara’ ahe pēu. Ahe inungar acoi Tūpa ñehe mombehusar Isaías aipo ehi vahe aracahe —ehi.

²⁴ Ahe yuviraso vahe chupe, fariseo remimondo yuvirecoi, ²⁵ oporandu yuvireco chupe:

—Evocoyase ndahei niha aipo nde Poropĩsirosar, ndahei avei Elías, ndahei eté Tũpa ñehe mombehusar imombehupri ereico. ¿Mahera ru evocoyase ereporoãpiramo? —ehi yuvireco chupe.

²⁶ Evocoyase fariseo upe aipo ehi:

—Che rumo i pĩpe aporoãpiramo; oime rumo mbia pe pãhuve ndapeicuai vahe. ²⁷ Ahe co ivi pĩpe ou vaherã che raquicuei. Che rumo ndahei eté seco catupri vahe aico ipĩtaquisã yora ãgua —ehi.

²⁸ Co opacatu mbahe yaposa tecua Betania ve, ïai Jordán rovai añihivei coti. Aheve Juan oporoãpiramo yepi.

Tũpa remimbou Ovesa nungar opacatu ava angaipa repirã

²⁹ Ahere ayihive Juan osepia Jesús oyemboyase oyese aipo ehi: “¡Pesepia, co Tũpa remimbou Ovesa nungar seropovẽhepirã opacatu ava angaipa mocañi ãgua! ³⁰ Añehese sese aipo ahe: ‘Che raquicuei oura mbia ivate catu vahe che sui. Esepia, yipive vahe ité che sui’ ahe acoi cuese. ³¹ Che rumo yipindar ndaicuai ahe yande remiaro ou vaherã. Sese niha aporoãpiramo i pĩpe vichico imboyecua ãgua che mu judío yuvirecoi vahe upe” ehi.

³² “Che asepia Espĩritu Santo ogüeyise ïva sui inungar apicasu, opita tupri iharive” ehi. ³³ “Yipindar rumo ndaicuai eté. Tũpa che cuai vahe rumo che poroãpiramo ãgua i pĩpe, aipo ehi cheu: ‘Acoi eresepiase Espĩritu Santo ogüeyise, opitase mbia harive, ahe mbia oporoãpiramora Espĩritu Santo pĩpe’ ehi. ³⁴ Che niha asepia ité. Sese, ‘Co Tũpa Rahir ité secoi’ ahe pẽu” ehi.

Yipindar vahe Jesús remimbohe

³⁵ Ahere ayihive Juan secoi aheve avei ore ñuvirío mbia oroico vahe reseve. ³⁶ Jesús ore cuãse, Juan aipo ehi oreu: —¡Pesepia, ndo co mbia Tũpa remimbou Ovesa nungar seropovẽhepirã! —ehi oreu.

³⁷ Aipo ihe ramoseve, oroguata voi eté supi.
³⁸ Evocoiyase omahe guaquiçuei coti. Ore repiase, oporandu oreu:

—¿Mbahe vo pesecami peico? —ehi oreu.

Ore evocoiyase,

—Porombohesar, ¿que vo nde recosa? —orohe chupe.

³⁹—Yaso, tapesepia ru —ehi oreu.

Evocoiyase oroso, oroyepota las cuatro pipe secosave. Aheve ore pĩtu ité ipĩri.

⁴⁰ Simón Pedro rivri, Andrés, ahe che ndugüer ahese.

⁴¹ Ahe rane aipo oseca viquehir Simón aipo ehi chupe:

—Orosepia ité Poropĩsirosar —ehi (‘Cristo’ oyapave).

⁴² Ipare voi, viraso Simón Jesús uve. Osepiase, Jesús aipo ehi chupe:

—Nde Simón, Juan rahir, ndererguã rumo Cefas —ehi (‘Pedro’ oyapave).

Jesús ñehe Felipe upe, Natanael upe avei oyeupi iguata ãgua

⁴³ Ahere ayihive voi Jesús ipihañemoñeta oso ãgua ivi Galilea rupi. Aheve osepia Felipe, aipo ehi chupe:

—Erio che rupi —ehi.

⁴⁴ “Aviye” ehi Felipe, ahe Pedro iyavei Andrés recua Betsaida pendar secoi. ⁴⁵ Ipare oso Natanael reca, aipo ehi chupe:

—Orosepia Poropĩsirosar, sesendar acoi Moisés oicuachía cuachiar porocuita resendar pipe aracahe, oicuachía avei sesendar Tũpa ñehe mombehusareta yuvireco. Ahe Jesús, José rahir, tecua Nazaret pendar —ehi.

⁴⁶ Natanael rumo aipo ehi:

—¿Oime pĩha yuvĩnose vahe ava aviye vahe Nazaret pendar? —ehi.

—Yaso, teresepia ru —ehi Natanael upe.

⁴⁷ Acoi oyepota senise Natanael ou, Jesús sepiase, aipo ehi voi chupe:

—Co mbia secoi judío ete ité, ndoporombopai vahe — ehi.

⁴⁸ —¿Mara ere che cua eve? —ehi Natanael chupe.

—Che oroepia yipive Felipe nde reca renondeve ivira higeravrive ereicose —ehi Natanael upe.

⁴⁹ —Porombohesar, jnde niha Tūpa Rahir ereico, Israel iguar rereciar guasu! —ehi Natanael chupe.

⁵⁰ —¿Che reroya voi eté acoi, “Oroepia iviravrive” che he sui tēi eve! Eresepiaara rumo co mbahe sui aviye catu vahe —ehi.

⁵¹ Iyavei aipo ehi opacatu upe:

—Supi eté pesepiara iva oyemboi tuprise iyavei Tūpa rembiguai eta igüeyise che, Ava Riquehír, upe, iyevisavei ivave yuvireco —ehi.

2

Mendasa tecua Caná ve

¹ Ipare imombosapisa ari pipe, oime mendasa tecua Caná ve, Galilea ivi rupi. Jesús si avei secoi aheve, ² iyavei Jesús ore semimbohe oroico vahe reseve ore soho avei yuvireco aheve. ³ Ëgüe ehi rumo opa tēi uva ricuer. Evocoyase Jesús si,

—Ndipo iri uva ricuer —ehi chupe.

⁴ —Cuña, ¿mahera vo aipo ere cheu? Che remimbotar rumo ari ndoyepota vitei cheu —ehi osi upe.

⁵ Ichi rumo aipo ehi ava igua rese ihañeco vahe upe:

—Peyapo opacatu semimbotar pe cuaise —ehi.

⁶ Aheve oime seis cambuchi guasu ita cuhi apopri, ñepeipei cambuchi pipe oique cincuenta litro, amove oique setenta litro i ipipe. Ahe judío oiporu pietase oyepoi ãgua yuvireco Tūpa porocuita mboaviye ãgua

yepi. ⁷ Evocoyase ahe ava igua rese ihañeco vahe upe aipo ehi:

—Pemboapipopa co cambuchi i pipe —ehi.

Omboapipopa tupri yuvireco. ⁸ Evocoyase aipo ehi ava ihañeco vahe upe:

—Penosemi chíhi, peraso pieta rese hañecosar uve —ehi.

Ëgüe ehi eté yuvireco. ⁹ Ihañeco vahe pieta rese osãha i oyeapo vahe uva ricuer. Ndoicuai eté que sui osẽ ahe uva ricuer; igua rese ihañeco vahe güeraño tupri oicua yuvireco. Evocoyase pieta rese hañecosar oñehe cuimbahe omenda vahe upe ¹⁰ aipo ehi chupe:

—Opacatu ava omondo uva ricuer aviye catu vahe yipindar. Ipare acoi ava hĩtaropase yuvireco, omondo ndasepii vahe. Nde rumo ereyapocatupaño aviye catu vahe, ahe cūrítei ramo erenose —ehi.

¹¹ Co yipindar vahe poromondiisa Jesús oyapo vahe aheve. Ipipe omboyecua güeco pĩratasa. Sese semimbohe viroya ité yuvireco.

¹² Ipare oso tecua Capernaum ve, ichi avei, tivri reseve supive, iyavei ore semimbohe eta oroso supí. Aheve oroico moviro ari tẽi.

Jesús omombopa ava mbahe rerecosar tũparo pipe sui

¹³ Ipare judío upendar Pascua pieta yepota senise, Jesús oso Jerusalén ve. ¹⁴ Aheve osepia tũparo guasu pipe corero ivipi rupi guarepochi rese mbahe mimba eta mondosar; guaca, ovesa iyavei apicasu. Aheve avei mbia guarepochi recuñarosar yuvinoi. ¹⁵ Co mbahe repiase rumo, Jesús oyapo tucumbo omombopa tupri tũparo sui opacatu ava imbahe reseve-seve, seimba ovesa, seimba guaca avei. Guarepochi recuñarosar sui otiapi-apii iguarepochi ivi rupi, iyavei imesa opa omombo. ¹⁶ Apicasu mondosareta uve aipo ehi:

—¡Penosepa co mbahe cūrítei ave sui! —ehi—. ¡Aní che Ru rēta mbahe mondosa tēi pereco! —ehi.

¹⁷ Aipo hese, ore oroyemomahenduha ñehesa icuachiapri aracahendar aipo ehi vahe rese: “Nde rēta rese che recatēhisa sui che mocañira” ehi vahe.

¹⁸ Evocoyase judío mborerecuar yuvirecoi vahe oporandu yuvireco chupe:

—¿Mbahe vo ereyapora nde mborerecuasa moporēhi āgua oreu cūrítei? —ehi yuvireco chupe.

¹⁹ Evocoyase,

—Pemondurupa co tūparo, che evocoyase mbosapi ari rupive amopuha irira —ehi judío eta upe.

²⁰ Aipo hese, mborerecuar aipo ehi yuvireco chupe:

—Co tūparo rumo imopuhasa cuarenta y seis araviter rupi, ¿ereicatura pñha aipo nde imopuha iri mbosapi ari rupive? —ehi yuvireco chupe.

²¹ Oñehese Jesús tūparo rese, güete upe tēi rumo aipo ehi. ²² Ocuera yevise rumo manosa sui, ore oroyemomahenduha ñehese agüer rese. Sese oroviroya sesendar ñehesa icuachiapri pipe iyavei semimombehugüer.

Jesús oicua opacatu ava recocuer

²³ Jesús secoi vitese Jerusalén ve Pascua pieta pipe, setá ité ava viroya osepiase poromondiisa sembiapo yuvireco.

²⁴ Ndoyeroyai eté rumo ahe ava eta rese. Esepia, opacatu ité ava recocuer oicua. ²⁵ Ndipoi eté que ambuae ava pñhañemoñeta mombehu āgua chupe. Esepia, ahe ité opa oicua.

3

Nicodemo omoñeta Jesús

¹ Oime mbia fariseo, Nicodemo serer vahe, ahe mbia mborerecuar judío pñhuve secoi vahe. ² Ahe oso Jesús pñri pñtu pipe, aipo ehi chupe:

—Porombohesar, oroicua ité Tūpa nde mbose ore mbohe āgua —ehi—. Esepia, ndipoi eté que ava oicatu vahe evocoi nungar poromondiisa apo Tūpa oyesecoēhise —ehi.

³ Evocoiyase,

—Supi eté aipo ahe ndeu: acoi ava ndoyesu piasu iri vahe, ndoiqueei chietera Tūpa mborerecuasave —ehi Jesús chupe.

⁴ Oporandu rumo aipo ehi:

—¿Mara ehira vo aipo ava oyesu piasu iri ocuacua pipe viña? —ehi—. ¿Oicatu irira pīha osi aviterve oique oyesu iri āgua? —ehi Jesús upe.

⁵ Jesús omboyeve chupe:

—Supi eté aipo ahe ndeu: acoi ava i pipe iyavei Espíritu pipe ndoyesui vahe, evocoi nungar ndoyuviroiquei chira Tūpa mborerecuasave. ⁶ Acoi oyesu vahe co ivi pīendar oyesupa sui, inungar tupri avei ahe; Espíritu pipe oyesu vahe rumo, ahe espíritu. ⁷ Ereyepīhamondii rene, ‘Pyesu piasu irira’ ahese ndeu. ⁸ Co rumo inungar ivitu oipeyu vahe güemimbotar rupi. Yepe sendusa siapu, ndicuasai rumo que sui turi, que oso no. Ēgüe ehi avei ava oyesu vahe Espíritu pipe —ehi Jesús chupe.

⁹ —¿Mara ehi pīha aipo evocoiyase? —ehi Jesús upe.

¹⁰ —¿Nde niha porombohesar ivate vahe Israel pendar ereico, nderesenducuai eté rumo co nungar mbahe! —ehi chupe—. ¹¹ Supi eté aipo ahe ndeu: ore oromombehu mbahe oroicua vahe, orosepia vahe ité. Pe rumo ndaperoyai eté ore remimombehu. ¹² Añehe tēi niha mbahe co ivi pīendar rese pēu; ndache reroyai eté rumo peye. Tahetru revo mbahe iva pendar amombehuse pēu ndaperoyai chietera viña —ehi.

¹³ “Esepia, ndipoi eté ambuae ava ivave oyeupi vahe; che güeraño, Ava Riquehir, iva sui agüeyi vahe

pëu. ¹⁴ Inungar Moisés osupi ivate mboi rahanga ivi iporupirëhisa rupi aracahe. Ëgüe ehi aveira che, Ava Riquehir, rerecosa ivate che rupira yuvireco ¹⁵ opacatu ava che reroyasar tecovesa apirëhi rereco ãgua yuvireco” ehi Jesús Nicodemo upe.

Tüpa poroaisusa ava upe nara

¹⁶ “Supi eté Tüpa osaisú iteanga opacatu ava. Sese ombou Guahir ñepeí vahe ‘tocañi tēi eme che Rahir reroyasar yuvireco’ oya, ‘tovireco tecovesa apirëhi vahe’ ohesave. ¹⁷ Esepia, nombouí Tüpa Guahir co ivi pìpe ava mocañi tēi ãgua; ahe rumo ombou ava pĩsiro ãgua.

¹⁸ “Ava viroya vahe Tüpa Rahir, ndahei eté ocañi tēi vaheerã; acoi ava ndoviroyai vahe rumo, oipisi itera cañisa yuvireco Tüpa Rahir ñepeí vahe reroyaëhisa pìpe. ¹⁹ Ëgüe ehi etera chupe yuvireco. Esepia, tesapesa supi eté vahe ou co ivi pìpe, ahe ava rumo oipota catu mbahe Caruguar suindar pĩtumimbi vahesave güeco ãgua yuvireco. ²⁰ Supi eté acoi opacatu ava oyapo vahe angaipa, ndosepia potai tesapesa, iyavei ndoyemboyai tesapesa rese yuvireco oangaipa mboyecua potaëhisave. ²¹ Acoi ava yuvirecoi vahe rumo mbahe supi eté vahe aposa pìpe, oyemboya tesapesa rese yuvireco mbahe Tüpa remimbotar oyapo vahe cua uca ãgua opacatu ambuae ava upe —ehi.

Juan Oporoãpiramo vahe oñehe iri Jesús rese

²² Ipare Jesús oso güemimbohe eta rese ambuae tecua rupi-rupi ivi Judea ve. Aheve secoi pucu raimi oporoãpiramo. ²³ Iyavei Juan oporoãpiramo vite Enón ve, Salim rerovicave. Esepia, aheve tuvichá i oime. Aheve ava yugüeru oñeapiramo uca ãgua. ²⁴ Co rumo mbahe yaposa Juan roquendaëhi viteseve.

²⁵ Evocoyase Juan remimbohe omboipi ambuae omu judío rese oyecopi-copi vaheṛã ì pipe ñeapiramosa re-sendar sui tēi yuvireco. ²⁶ Sese yuviraso Juan uve aipo ehi:

—Ore mbohesar, acoi secoi vahe nde rese ìai Jordán rovai, sese acoi ereñehe oreu, cūritei ahe oporoāpi-ramoño tēi iyavei opacatu yuviraso supi —ehi semimbohe yuvireco chupe.

²⁷ Evocoyase aipo ehi güemimbohe upe:

—Ava ndoicatu mbahe apo Tūpa nombouise chupe.

²⁸ Pesendu tupri ité che ñehe cuese: “Che ndahei Poropĩsĩrosar aico, che rumo senonde imboupri tēi aico” ahese pēu. ²⁹ Esepia, acoi mendasa oimese, vireco vahe güembirecovi ahe imevi, osenduse rumo imboripar iñehe yivii ohã, oyemboviharete sese. Ĕgüe ahe avei che cūritei, ayemboviharete Jesús rese. ³⁰ Ahe niha seco ivate catu-catuño itera ari rupi oico; che rumo ivi coti catu aicora ichui —ehi Juan güemimbohe upe.

Iva suindar ou vahe

³¹ Iva suindar ou vahe ivate catu ité opacatu sui. Co ivi pipe oyesu vahe rumo co ivi pipendar ité. Sese niha mbahe ivi pipendar rese tēi oñehe. Acoi ou vahe rumo iva sui, ivate catu ité opacatu sui. ³² Iyavei mbahe güembiepia osendu vahe reseño ité oñehe. Ndipoi eté rumo semimombehu viroya vahe yuvireco. ³³ Acoi ava viroya vahe rumo iñehe, “Supi tupri ité Tūpa omombehu mbahe” ehi. ³⁴ Co Tūpa remimbou niha omombehu Tūpa ñehe. Esepia, Tūpa omondo ité oEspíritu sese. ³⁵ Tūpa osaisu Guahĩr iyavei opacatu mbahe omondo ipove. ³⁶ Opacatu ava viroya vahe Tūpa Rahĩr, vireco ité tecovesa apirēhi; acoi ndoviroyai vahe rumo, ndovirecoi chietera co tecovesa. Ahe rumo oipisira Tūpa ñemoirosa ipĩrata vahe ité yuvireco.

4

Jesús oñehe Samaria pendar cuña upe

¹ Fariseo eta oyandu yuvireco Jesús vireco catuse ava oyeupi oguata vahe iyavei oporoãpiramo catuse avei Juan sui ² (ndahei eté rumo Jesús oporoãpiramo; semimbohe tēi rumo êgüe ehi yuvireco). ³⁻⁴ Jesús oicuase aipo nungar, osê Judea sui, oyeví iri ivi Samaria rupi, Galilea ve yuviraso.

⁵ Aheve Samaria ivi rese oyepota tecua Sicar serer vaheve yuvireco. Ahe tecua rerovicave oime ivi Jacob omondo vahecuer guahir José upe aracahe. ⁶ Aheve oime ivicuar, chupe, “Jacob iguagüer” ehi yuvireco. Ahe igua rembe rese Jesús oguapí mbiter ari potase ocueraise oĩ. ⁷⁻⁸ Semimbohe eta rumo opacatu yuviraso tecuave mbahe tembihu rerocua. Aheseve cuña, Samaria pendar, oyepota iguave i renose. Ahese Jesús aipo ehi chupe:

—Emboumi chíhi nde i taihu —ehi.

⁹ Cuña, Samaria pendar, rumo omboyeve chupe:

—¿Mahera vo, “Embou i taihu” ere cheu? Nde rumo judío; che cuña coha pendar aico —ehi chupe. (Esepia, judío noñehei vahe ité ava Samaria pendar upe yuvireco yepi.)

¹⁰ Evocoyase omboyeve cuña upe:

—Ereicuase Tūpa porerecosa ndeundar viña iyavei ere-icuase ahe ava ndeu i rese oporandu vahe, nde evocoyase ereporandura sese chupe. Ahe evocoyase omondora i ndopai vahe ndeu viña —ehi cuña upe.

¹¹ —Ndererecoi rumo i renose água. Esepia, co igua ipicucú ité. ¿Que sui vo aipo evocoyase eremboura i ndopai vahe cheu viña? —ehi cuña chupe—. ¹² Esepia, co igua ore ramoi Jacob oseya oreu. Cohave suiño ité niha ahe oihu, tahir avei oihu yuvireco ichui iyavei opacatu

seimba. ¿Nde pñha ivate catu ereico ichui? —ehi cuña chupe.

¹³ —Opacatu ava oñhu vahe co ñ, ihuseiño itera yepi, —ehi cuña upe—. ¹⁴ Acoi ava oñhu vahe rumo ñ che remimondo, ndihusei iri chietera. Esepia, che amondo vahe ñ ndopai vaherã ité. Ahe omboura tecovesa ndopai vahe ava upe —ehi cuña upe.

¹⁵ —Nde ava, emboumi ahe ñ taiñhu che husei iriẽhi ãgua, tanose iri eme ñ cohava sui —ehi.

¹⁶ —Eso rane nde mer reca, seseve peyu cohava —ehi cuña upe.

¹⁷ —Ndarecoi rumo che mer —ehiño cuña chupe.

—Supi eté aipo ere, ndererecoi eté nde mer. ¹⁸ Esepia, cinco tupri erereco nde mer iyavei cūrítei erereco vahe nde resendar tẽi. Supi eté aipo ere: “Ndarecoi che mer” ere cheu —ehi cuña upe.

¹⁹ —Nde ava aviye moco Tũpa ñehe mombehusar ereico cheu —ehi—. ²⁰ Ore ramoi eta omboetei Tũpa co ivitri rese yuvireco. Pe rumo, judío peico vahe, “Jerusalén ve yamboeteira Tũpa yepi” peye —ehi.

²¹ —Che reroya eve cuña, viroví ari pẽu peso iriẽhi ãgua Tũpa mboetei co ivitri rese iyavei Jerusalén ve.

²² Pe Samaria pendar peico vahe pemboetei tẽi pe rembiguaẽhi. Ore rumo oroicua oromboetei vahe. Esepia, ñepisirosa ou judío sui. ²³ Oyepota rumo ari cute, ahe ité co cūrítei co pĩpe suive supi eté Tũpa omboetei vahe, Tũpa Espĩritu pĩpe omboeteira yuvireco. Supi eté Tũpa, “Ëgũe tehi che mboetei yuvireco” ehi. ²⁴ Esepia, Tũpa niha Espĩritu secói. Sese acoi omboetei vahe oyapora Espĩritu pĩpe supi tupri vahe ité yuvireco —ehi cuña upe.

²⁵ Cuña evocoyase aipo ehi chupe:

—Che aicua Poropĩsirosar yu ãgua (ahe ‘Cristo’). Acoi ahe ouse, omombehu tupřira opacatu mbahe yandeu — ehi cuña chupe.

²⁶—Che niha ahe aico añehe vahe ndeu — ehi cuña upe.

²⁷ Aheseve semimbohe eta oyevi yuvireco, nombovıhaipři güemimbohe cuña rese oñemoñetase. Ndipoi eté rumo que “¿mbahe rese vo peñemoñeta?” ehi vahe, que “¿mahera vo ereñehe co cuña upe?” ehi vahe yuvireco chupe. ²⁸ Ahese cuña oseya tupřiño ocambuchi, oso güecuave aipo ehi ava eta upe:

²⁹ —Perio, tapesepia pe ava omombehupa tupři vahe che recocuer cheu. ¿Ndahei pıha ahe Poropĩsirosar? — ehi omu eta upe.

³⁰ Evocoyase ava rehii yuvınose tecua sui, yuvıraso Jesús recosave sepia. ³¹ Ava yepotaẽhi vıteseve, semimbohe eta,

—Ore mbohesar, ecarumi — ehi tẽi yuvireco chupe.

³² —Oimera rumo ambuae mbahe cheu che movıracua ãgua. Ahe ndapeicuai vahe — ehi güemimbohe eta upe.

³³ Semimbohe aipo hese oporandu-randu tẽi oyeupe yuvireco:

—¿Oime pıha que ava güeru vahe mbahe semihura? — ehi tẽi yuvireco.

³⁴ Güemimbohe upe rumo aipo ehi:

—Che movıracuasa rumo che mbousar porocuita, ahe ayapora iyavei amboaviye rane itera iporavıqui — ehi—.

³⁵ Esepia, pe aipo peye: ‘İpane vite irungatu yasi mbahe miti ha monuha ãgua’ peye yepi; che rumo aipo ahe pẽu: pemahe pe ivırındar ava eta rese. Opa ité opıha omoıngatu yuvireco, ahe inungar mbahe miti ha yaviye vahe. ³⁶ Acoi oporavıqui vahe Tüpa upe ava hã pısi ãgua rese, ahe oipısira sepři yuvireco iyavei semimonuha tecovesa ndopai vaheve nara ité yuvirecoira. Evocoyase

ava upe oñehe vahe iyavei oipisi vahe ava hã ivave nara, oyoya guasu oviharetera ipisipri rese yuvireco. ³⁷ Supi eté co ñehesa aipo ehi vahe: ‘Ñepei eté omaheti vahe; imonuhasar rumo ambuae ité’ ehi. ³⁸ Che opocuai ava hã pisi ãgua ambuae ava poraviquisave; yipindar rumo ambuae oporaviquí ité yuvireco sese. Pe evocoyase peique iporaviqui agüer rupi —ehi güemimbohe eta upe.

³⁹ Setá ava tecua Sicar pendar Samaria pipe viroya cuña ñehe sui yuvireco, “Opacatu mbahe che rembiapo omombehu cheu” ihesa sui. ⁴⁰ Evocoyase ava rehii Samaria pendar yuviraso chupe ‘epitami ore piri’ oya. Evocoyase opita ipiri ñuvirío ari rupi. ⁴¹ Setá catu iri ava viroya yuvireco iñehe ité renduse. ⁴² Evocoyase ava eta aipo ehi cuña upe yuvireco:

—Cūritei oroviroya ité cute, ndahei nde ñehe suiño oroviroya. Esepia, ore ité orosendu iñehe cute, oroicua avei ahe supi eté opacatu ava pĩsirosar ou vahe —ehi ava eta cuña upe yuvireco.

Jesús ombogüera mborerecuar rahir

⁴³ Ñuvirío ari pare, Jesús osẽ ivi Samaria sui, osoño ivi Galilea ve. ⁴⁴ Ahe ae ité aipo ehi: “Tũpa ñehe mombehusar ndasaisusai iivi rese yuvireco yepi” ehi. ⁴⁵ Oyepotase oivi Galilea ve, ahe pendar ava oipisi tupri yuvireco. Esepia, setá osepia opacatu mbahe sembiapo Pascua pietase Jerusalén ve.

⁴⁶ Evocoyase oyevi iri tecua Caná ve Galilea ivi rese, aheve acoi i tẽi oyapo uva ricuer. Tecua Capernaum ve oime mbia mborerecuar guasu ivirindar. Ahe vireco guahir imbaheasi vahe. ⁴⁷ Oyanduse co mbia mborerecuar Jesús yepota Judea sui ivi Galilea ve, ahe ramoseve oso voi seca ‘toso che rõtave, tombogüerami che rahir omano

pota vahe cheu' oya. ⁴⁸ Evocoyase aipo ehi ahe mborerecuar upe:

—Pe ndache reroyai eté peye ndapesepiaise mbahe poromondiisa che rembiapo —ehi.

⁴⁹ —Che Yar, eyu poyavañomi tēi che rahir mano viteēhiseve —ehi mborerecuar chupe.

⁵⁰ —Eyevi nde rētave; nde rahir oicove —ehi mborerecuar upe.

Ahese viroya voi oyeupe ñehesa. Sese oyevi voi eté güētave. ⁵¹ Amombri seco viteseve, yuvinoña voi sovaichi sembiguai imombehui:

—¡Nde rahir oicove! —ehi yuvireco chupe.

⁵² Evocoyase oporandu: “¿Mbahe hora pipe tupri ocuera?” ehi.

—Irapipe caharuse, la una pipe, ndasohi iri —ehi yuvireco chupe.

⁵³ Ahese mborerecuar ipihañemoñeta: “Ahe hora pipe tupri niha Jesús aipo ehi cheu: ‘Nde rahir oicove’ ehi” ehi. Evocoyase ahe iyavei opacatu imu eta viroya Jesús yuvireco.

⁵⁴ Co imoñuviriosa poromondiisa oyapo Jesús güecocuer cua uca āgua ivi Judea sui oyevise Galilea ve.

5

Jesús ombogüera ava ndoguatai vahe tecua Betzata pendar

¹ Ipare oime judío pieta guasu Jerusalén ve, aheve Jesús oso. ² Ahe tecua roquendipi, Ovesa serer vahe coti, oime ivicuar i vireco vahe, serer hebreo ñehē pipe Betzata. Ahe sese oyere tupri poyandepo oquendipi yapayere vahe pāve. ³ Aheve ava eta imbaheasi vahe oñeno yugüeru ivi rupi: ndasesapisoi vahe, ndoguatai vahe, ndipindugüei vahe avei i ñemomiisa osāro yuvireco yepi. ⁴ Esepia, amove tēi Tūpa rembiguai ogüeyi ahe ivicuarve i momii

ãgua, “Acoi ahe rane ocui vahe i ñemomiiseve ive, ocuera voi eté ombaherasisa sui” ehi yuvireco chupe. ⁵ Aheve oime mbia ombaherasisa vireco vahe treinta y ocho araviter rupi. ⁶ Osepiase Jesús, oicua voi eté vireco pucuse ombaherasisa. Evocoyase oporandu chupe:

—¿Ereipota vo nde cuera ãgua? —ehi chupe.

⁷ Imbaheasi vahe omboyevi:

—Nde mbia, ndipoi eté que ava che mongui vaheã i pipe i ñemomiise. Asãha tẽi ‘tacui’ viya. Ambuae rane-raneño rumo yuvirocui che sui yepi —ehi.

⁸ Evocoyase,

—Epũha, esupi nde rupa, eguata —ehi imbaheasi vahe upe.

⁹ Ahe ramosave ahe mbia ocuera tupri, osupi vupa, uguata voi oico. Mbituhusa ari pipe tupri rumo egũe ehi. ¹⁰ Evocoyase judío aipo ehi ocuera vahecuer upe yuvireco:

—Co pipe rumo mbituhusa ari, nande cuaitai nde rupa rese ndevosii ãgua —ehi yuvireco chupe.

¹¹ Ahe mbia evocoyase,

—Che mbogüerasar rumo aipo ehi cheu: ‘Esupi nde rupa, eguata’ ehi cheu —ehi judío eta upe.

¹² —¿Uma vo aipo ehi ndeu? —ehi judío yuvireco chupe.

¹³ Ahe mbia rumo ndoicua iri ombogüerasar. Sese ndoicatui imboyevi ãgua. Esepia, Jesús aviyeteramo tẽi ndoyecua iri ava rehii pãhuve. ¹⁴ Coiye rumo Jesús osepia iri tũparove ahe mbia, aipo ehi chupe:

—Ereicua co nde cuerasa cũritei, aní ereyemboangaipa iri mbahe tẽi catu reime iri ãgua ndeu —ehi chupe.

¹⁵ Ahe mbia evocoyase oso voi eté judío eta rereciar upe ‘Jesús che mbogüera’ oya. ¹⁶ Sese judío osaquicue moña iyavei oyuca pota yuvireco mbituhusa ari pipe iporombogüera rese tẽi. ¹⁷ Ahe rumo aipo ehi:

—Che Ru niha oporaviquiño ité co ari rupi iyavei che aporaviquiño avei —ehiño judío upe.

¹⁸ Aipo hese, judío, “Yayuca ité” ehi. “Esepia, ndahei mbítuhusa ari güeraño nomboyeroyai, ahe rumo oyeapo Tūpa nungar, Tūpa uve ‘che Ru’ ohe angahu tēisa pipe” ehi yuvireco chupe.

Tūpa Rahir mborerecuasa

¹⁹ Evocoyase Jesús aipo ehi judío upe: “Supi eté aipo ahe: Tūpa Rahir ndoicatu eté mbahe apo oyesui tēi, Vu rembiapo mbahe oicua; aheño tupri avei oyapo yepi.

²⁰ Esepia, Tu Guahir raisupave omboyecua opacatu mbahe güembiapo chupe iyavei omboyecuaño vite itera mbahe poromondiisa tuvicha catu vahe sembiaporã, ‘¡Mara ehi rutei co!’ pehe tēi água chupe. ²¹ Esepia, che Ru ombogüerayeví omano vahe iyavei omondo tecovesa chupe. Ëgüe ehi avei Tahir omondo tecovesa ava upe güemimbotar rupi. ²² Iyavei Tu nomondo iri ava upe sembiapo repri. Esepia, ombou Guahir upe opacatu pīratasa ava upe sembiapo repri mondo água. ²³ Ëgüe ehi Guahir upe opacatu ava imboetei água yuvireco inungar Tu imboeteipri. Acoi ava Tahir nomboetei vahe, Tu imbousar avei nomboetei yuvireco.

²⁴ “Supi eté aipo ahe pēu: acoi oyapisaca vahe che ñehe rese, viroya vahe avei che mbousar, ahe virecora tecovesa apirēhi vahe; ndahei chietera imocañipri. Esepia, osē manosa sui oipisi tecovesa. ²⁵ Supi eté aicua uca pēu: oura ari imombehupri, cūrítei eté co ari oyepota, ava eta omano vahecuer osendura Tūpa Rahir ñehe. Acoi osendu vahe, oicoveño itera. ²⁶ Esepia, Tu vireco tecovesa oyese. Ëgüe ehi avei Guahir upe imondo tecovesa rereco água. ²⁷ Ombou avei imborerecuasa água chupe ava recocuer rese iporandu água. Esepia, ahe Ava Riquehir

secoi. ²⁸ Peyepihamondii rene aipo che hesa sui. Esepia, oyepotara ari imombehupri, ahese opacatu ava omano vahecuer osendura iñehe. ²⁹ Ahese yuvinosera vuvipa sui. Oyapo vahe mbahe tupri, ocuerayevira yuvireco tecovesa apirēhi rereco āgua; acoi oyapo vahe rumo mbahe naporai vahe, ocuerayevira yuvireco Tūpa ñemoirosa pisi āgua” ehi Jesús judío rerecuar upe.

Jesús omboyecua tupri omborerecuasa

³⁰ “Che ndaicutai mbahe apo cheyesui tēi. Che, ‘Pe peyavi vahe mbahe, peipisira che Ru ñemoirosa’ ahe ava ndaseco pōrai vahe upe che cuaita rupi iyavei che amombehu vahe supi tupri ité. Esepia, che ndaipotai che remimbotar tēi mbahe apo āgua. Che Ru, che mbousar remimbotar rumo ayapo. ³¹ Que cheyese ae tēi añehese, ahese ndache reroyai chira peye viña. ³² Oime rumo ambuae che mombehugar. Ahe supi eté che mombehu pe seroya āgua; ahe Juan. ³³ Pe niha, pemondo ava chupe imboporandu mbahe rese. Ahe semimombehu niha supi tupri vahe ité. ³⁴ Yepe ahe supi eté viña, che rumo ndayeroyai ava tēi che mombehusa rese. Che rumo aipota peñepisiro āgua. Sese aipo ahe pēu. ³⁵ Juan niha inungar tataendi, ēgüe ehi omboyecua mbahe supi eté vahe. Sese pe peyemboviha raimi tēi iporombohesa tesapesa nungar pipe peico. ³⁶ Che rumo areco che yecua ucasar aviye catu vahe Juan sui. Ahe niha co mbahe ayapo vahe yepi. Ahe sese che Ru che cuai yapo āgua. Co mbahe ayapo vahe, ahe ité omboyecua che Ru Tūpa che mbousar. ³⁷ Iyavei che Ru avei eté che cua ucasar. Ahe iñehe rumo ndapesendui vahe ité, iyavei ahe ndapesepiai eté. ³⁸ Iñehengagüer icuachiapri avei ndoiquei eté pe rese. Ipipe niha ndache reroyai eté peye che Ru che mbose. ³⁹ Pe peicua tupri pota icuachiapri ‘icuapa tupri pipe revo tecovesa apirēhi

yarecora' peye viña. Co rumo cuachiar che mombehu vahe: ⁴⁰ pe rumo ndapeyu potai eté cheu co tecovesa apirēhi rereco āgua.

⁴¹ “Ndaipisii eté ava che mboeteisa tēi. ⁴² Iyavei opocua Tūpa ndapesaisuise. ⁴³ Che niha ayu che Ru rer pipe. Pe rumo ndache reroyai eté peye. Ouse rumo que ambuae ava oyesui tēi oñehe vahe, evocoi nungar tēi peroyara. ⁴⁴ Ndapeicatui eté che reroya āgua peye. Esepia, pe ae tēi peyemboetei; ndapesecai eté Tūpa ñepe vahe suindar yemboeteisa. ⁴⁵ Ndapepihañemoñetai chira che pe recocuer mombehu āgua rese che Ru rovai. Moisés peroya vahe ité niha oicuchía pe Tūpa reroyaēhisa chupe imombehu āgua. ⁴⁶ Peroyase rumo Moisés ñehe viña, che avei che reroyara peye viña. Esepia, Moisés niha oicuchía che resendar ñehesa. ⁴⁷ Ndaperoyaise ahe sembicuachía, evocoyase ndapeicatui chietera che remimombehu reroya āgua” ehi Jesús oamotarēhimbar upe.

6

Jesús oyopoi cinco mil ava

¹⁻⁴ Ipare Pascua pieta ñipiimi aipo Jesús osasa ipa Galilea serer vahe oso, ahe serer avei Tiberias. Ava rehii avei yuviraso saquicuei. Esepia, osepia ité yuvireco oyapose mbahe poromondiisa guasu imbaheasi vahe mbogüerese. Oyepotase ivi rese yuviraso, evocoyase oyeupi ivitri rese. Aheve oguapi opacatu güemimbohe eta reseve yuvinoi. ⁵⁻⁶ Omahese ava rehii oyeupindar rese, ahese aipo ehi Felipe upe:

—¿Que vo yarocuara mbahe tembihu co opacatu ava upe nara? —ehi secoãhasave.

Ahe rumo oicua ité mbahe güembiaporã. ⁷ Evocoyase Felipe omboyevi chupe:

—Dosciento denario pan ndosupitii chietera que chĩhi-chĩhimi ava retacuer viña —ehi.

⁸ Aipo hese, ñepeí semimbohe pãhu pendar, Simón Pedro rivri, Andrés aipo ehi chupe:

⁹ —Co chĩhivahe vireco cinco pan, iyavei ñuvirío pira, ¿iyacatura vo co ava retacuer? —ehi.

¹⁰ Evocoyase aipo ehi:

—Pemombehu opacatu upe toguapí yuvireco —ehi güemimbohe upe.

Capíhi reimesave opa omboguapí yuvireco cinco mil ava. ¹¹ Evocoyase oipísi cinco vahe pan, “Aviye ndeu” ohe pare Vu Tũpa upe, opa ombóhi-mbóhi imondo ava rehíi upe. Ēgüe ehi avei pira upe, imondopa semimbotar rupi-rupi yuvireco. ¹² Opase ava ihĩtaro,

—Pemonuhapa sumbĩrer iyemombucaēhi āgua —ehi güemimbohe upe.

¹³ Evocoyase omonuha doce iruova sumbĩrer yuvireco pan cincomi vahe sui. ¹⁴ Evocoyase ava eta co poromondiisa guasu Jesús rembiapo repiase, aipo ehi yuvireco:

—Supi eté co uve revo acói: “Oura Tũpa ñehe mombehusar ivi pĩpe” ehi icuachiapri aracahendar pĩpe —ehi yuvireco.

¹⁵ Jesús rumo oicuase ava opĩratasa pĩpe tēi güeraso pota āgua mborerecuar guasu vireco āgua oyeupe nara yuvireco, ahese oyeupi iri oso ivate catu. Aheve ahe ae güeco āgua.

Jesús oguata i hari rupi

¹⁶ Pĩtu ramosé ogüeyi yuviraso Jesús remimbohe ipave, ¹⁷ yuviroha carite pĩpe sasa āgua yuvireco tecua Capernaum ve yuviraso. Ahese pĩtu ité. Jesús rumo ndoyevi vitei eté. ¹⁸ Ahese oipeyu pĩrata ivitu, i avei ohitu pĩrata. ¹⁹ Yuviraso pucumi tēi cinco, anise seis kilómetro rupi.

Ahese osepia Jesús yuvireco osupiti senise carite. Ahe i hari rupi oguata oso chupe. Evocoyase osiquiye ité yuvireco ichui. ²⁰ Ahe rumo aipo ehi güemimbohe upe:

—¡Che Jesús aico, pesiquiyei rene! —ehi.

²¹ Evocoyase sorivete yuvireco carite pipe seroha. Iparemi tēi oyepota yuviraso oyuvirasosave.

Ava eta oseca Jesús

²² Ahere ayihive ava rehii opita vahe sovai yuvireco, “Semimbohe año rumo yuviraso ñepeí vahe carite pipe. Jesús rumo ndosoi eté güemimbohe rupi” ehi tēi yuvireco.

²³ Aheseve rumo ambuae carite viroyepota seru yuvireco tecua Tiberias pendar, acoi Jesús ava remihura pan reroyeroqui agüer rerovicave. ²⁴ Evocoyase ava rehii oicuae Jesús semimbohe reseve iporēhise yuvireco, yuviroha yuviraso āgua co ambuae carite pipe tecua Capernaum ve seca.

Jesús, pan nungar, tecovesa apirēhi vahe secói

²⁵ Oyepotase ava rehii ipa rovai, aheve osepia Jesús yuvireco.

—Ore mbohesar, ¿marase vo ereyepota cohave? —ehi yuvireco chupe.

²⁶ Evocoyase aipo ehi chupe:

—Supi eté aipo ahe pēu. Pe rumo che reca peye che pe mbocarusa rese tēi, ndahei co che poromondiisa roroyasave ité peico pota che rupi. ²⁷ Peporaviqui eme catu tembihu ndasecosei vahe rese; iyacatu rumo peporaviqui tembihu secose vahe rese omondo vahe tecovesa apirēhi. Co tembihu che, Ava Riquehir, amondora pēu. Esepia, che Ru Tūpa omboyecua ité che ichuindar aicose —ehi.

²⁸ Aipo hese,

—¿Mbahe mboraviqui vo oroyapora Tūpa upe? —ehi yuvireco.

²⁹ —Tūpa oipota pe che reroyara peye che semimbou che recose —ehi ava eta upe.

³⁰ Evocoyase,

—¿Mbahe poromondiisa vo eremboyecua irimira oreu orosepia vaheã nde reroya tupri catu ãgua? ³¹ Esepia, aracahe ore ramoi eta yuvirohu ivi iporupirêhisa rupi. Icuachiapri aracahendar pipe omombehu: ‘Omondo pan iva pendar semihura’ ehi —ehi ava eta yuvireco chupe.

³² —Supi eté amombehu pëu: ndahei Moisés omondo pan iva pendar chupe, che Ru rumo omondo chupe. Cūrítei che Ru ombou pëu pan supi eté vahe iva sui.

³³ Esepia, co pan ombou vahe Tūpa iva suindar ité. Ahe omondora tecovesa ivi pipendar upe —ehi ava eta upe.

³⁴ Evocoyase,

—Ore mbohesar, embouño catu co pipe suive aipo pan oreu —ehi yuvireco chupe.

³⁵ —Che ité ahe pan aico tecovesa mondo ãgua. Acoi ou vahe cheu ndiyumbiasí iri chietera iyavei acoi che reroya vahe ndihusei chiaveira. ³⁶ Aipo ahe niha acoi pëu. Yepe pe che repia peye viña, pe rumo ndache reroyai eté peye. ³⁷ Opatatu ombou vahe ava che Ru cheu, cheu ité yugüerura; acoi yugüeru vahe cheu, aipisira; ndamombói chietera cheyesui. ³⁸ Esepia, ndayui iva sui mbahe che remimbotar apo ãgua tēi; ayu rumo che mbousar porocuaíta apo ãgua. ³⁹ Che Ru che mbousar ndoipotai que ñepeí ava ombou vahe cheu amocañira. Ahe semimbotar rumo che ambogüerayevira ahe ari ipa vahe pipe.

⁴⁰ Che Ru oipota avei opatatu ava oyeroya vaheã che, Tūpa Rahir, che recosa rese. Ipipe vireco aveira tecovesa apirêhi vahe yuvireco. Supi eté ambogüerayevira ari ipa vahe pipe curi —ehi ava eta upe.

⁴¹ Evocoyase judío eta oñehe-ñehe tēi sese yuvireco, “Che pan aico, agüeyi vahe iva sui” ihesa rese ⁴² aipo ehi:

—Co niha acoi Jesús, José rahir. Yande yaicua ité tu, ichi avei. ¿Mahera ru, “Che agüeyi vahe ìva sui” ehi no? —ehi yuvireco chupe.

⁴³ Evocoiyase judío eta upe aipo ehi:

—Pepoiño che reroïrosa sui. ⁴⁴ Ndipoi chietera que oicatu vahe ou cheu, nomonguerêhiise che Ru che mbousar; omonguerêhi vahe rumo oicatu yugüeru cheu. Ahe ambogüerayevira ari ipa vahe pipe. ⁴⁵ Tüpa ñehe mombehusar cuachiar pipe aipo ehi: ‘Tüpa pe mbohera opacatu’ ehi. Sese acoi osendu vahe che Ru ñehe, oyembohe vahe avei sese, evocoi nungar yugüerura cheu.

⁴⁶ “Ndipoi eté que ñepeï ava osepiã vahe che Ru; acoi ichui ou vaheño ité, ahe güeraño tupri ité osepiã. ⁴⁷ Supi eté aipo ahe pëu: acoi che reroya vahe vireco tecovesa apirêhi. ⁴⁸ Che pan nungar aico amondo vahe tecovesa. ⁴⁹ Aracahe pe ramoï eta niha yuvirohu ité tembihu maná serer vahe ìvi iporupirêhisa rupi. Ahe rumo opa iriño ité omano yuvireco. ⁵⁰ Che rumo añehe pan ìva sui ogüeyi vahe rese, acoi ava ohu vahe, nomanoi chietera. ⁵¹ Ahe pan oicove vahe niha che aico ìva sui ogüeyi vahe; acoi ohu vahe co pan, oicovera apirêhi vaherã ité. Co pan amondo vaherã, ahe che rete ité. Ahe amondora ava recocuer rese” ehi judío eta upe.

⁵² Aipo hese, judío rereciar oyecopi-copi yuvireco aipo ehi:

—¿Mara ehira vo aipo co imbou tēi güete yande tohu viña? —ehi yuvireco.

⁵³ —Supi eté aipo ahe pëu: ndapehuise Ava Riquehir rete, ndapehuise avei suvi, ndaperecoi chietera tecovesa. ⁵⁴ Acoi ohu vahe che rete, oihu vahe avei che ruvi, vireco tecovesa apirêhi iyavei che ambogüerayevira ari ipa vahe pipe. ⁵⁵ Esepia, che rete supi eté vahe tembihu; che ruvi supi eté vahe avei ìgua. ⁵⁶ Acoi ohu vahe che rete, oihu

vahe avei che ruvi, secoi che rese, che avei aico sese. ⁵⁷ Che Ru, che mbousar, vireco tecovesa. Ichui che aicove; êgüe ehi aveira che husar che sui yuvirecovera. ⁵⁸ Añhe pan iva sui ogüeyi vahe rese. Co pan ndahei maná pe ramoi eta yuvirohu vahe nungar. Esepia, yande ramoi opaño ité omano yuvireco. Acoi ohu vahe rumo co che rete, oicovera apirêhi vaherã ité —ehi ava eta upe.

⁵⁹ Jesús oporombohe co mbahe rese judío ñemonuhasave tecua Capernaum ve.

Ñehesa tecove apirêhisa resendar

⁶⁰ Osenduse co yembohesa, setá Jesús rupi oguata vahe aipo ehi oyeupe yuvireco:

—Aipo semimombehu yavai eté seroya ãgua; ¿ava vo viroya tẽira viña? —ehi yuvireco.

⁶¹ Jesús rumo oicua voi eté ñhehe-ñhehe tẽise co mbahe rese yuvireco, evocoyase oporandu:

—¿Pemboasiño tie che ñhehe? ⁶² ¿Mara peyera pïha che repiase peye che, Ava Riquehir, ayeupise che reco agüerve vicho viña? ⁶³ Espíritu ité niha omondo tecovesa; yande retecuer rumo êgüe ehi tẽi vahe. Co amombehu vahe pëu ahe espíritu iyavei tecovesa. ⁶⁴ Oime vite rumo amove pe pãhuvé ndache reroyai vahe —ehi ava rehii upe.

Esepia, Jesús oicua ité yipisuive uma ndoviroyai chira, oicua avei uma ava omondora yamotarêhimbar upe ⁶⁵ aipo ehi:

—Sese niha acoi aipo ahe pëu: “Ndipoi chietera que ava ou vaherã cheu che Ru nomonguerêhiise imbou” ahe —ehi.

⁶⁶ Ichuive tupri Jesús rupi oguata vahe setá oseya yuvireco; ndoguata iri eté yuvireco supi. ⁶⁷ Evocoyase oporandu doce tupri vahe güemimbohe upe:

—¿Pe avei vo che reyapa pota peye? —ehi.

⁶⁸ Simón Pedro rumo omboyevi chupe:

—Che Yar, ¿ava upe vo oroso irira? Nde güeraño ité niha erereco ñehesa tecovesa apirēhi vahe. ⁶⁹ Ore nde reroyasar ité oroico iyavei oroicua nde ndaseco marai vahe, Tūpa supi eté vahe remimbou ereico —ehi Pedro chupe.

⁷⁰ —Che niha opoporavo doce peico vahe, ñepei rumo pe pāhu pendar caruguar ité —ehi Simón upe.

⁷¹ Jesús oñehe Simón Iscariote rahir, Judas, rese. Yepe doce semimbohe pāhu pendar viña, ahe rumo omondora ava yamotarēhimbar upe.

7

Jesús ndoviroyai tivri yuvireco

¹ Ipare Jesús uguata ivi Galilea rupi. Ndoico potai eté ivi Judea rese. Esepia, aheve ava judío eta oseca ité ‘yayuca’ oya yuvireco. ²⁻³ Virovise judío pieta guasu teyupa apo āgua yuvireco, ahese tivri aipo ehi yuvireco chupe:

—Erepita eme cohave. Eso ivi Judea ve; ahe pendar nde rupi uguata vahe avei tosepia poromondiisa nde rembiapo yuvireco. ⁴ Esepia, acoi oyapo pota vahe mbahe, noñomi eté mbahe güembiapo. Nde ereyapo ité mbahe poromondiisa. Sese iya eremboyecua opacatu ava upe —ehi tivri yuvireco chupe.

⁵ Seroyaēhisave tēi avei tivri aipo ehi yuvireco chupe.

⁶ Evocoyase vivri upe aipo ehi:

—Ndehi vitei rumo ari che so āgua. Pe guata āgua rumo opacatu ariño tēi aviye. ⁷ Esepia, pe ndape amotarēhii eté ava co ivi pipendar; che rumo che amotarēhi ité yuvireco. Esepia, che amboyecua ité mbahe sembiapo naporai vahe chupe. ⁸ Pesoño pe pieta repia; che rumo ndaso vitei chira. Esepia, ndosupiti vitei ari cheundar —ehi vivri upe.

⁹ Evocoyase Jesús opitaño Galilea ve.

Jesús oso omu judío eta pietasave

¹⁰ Vivireta so pare, Jesús avei oso pietasave. Ndoyem-boyecuai eté rumo ava upe. ¹¹ Judío eta oseca tēi yuvireco pietasave aipo ehi:

—¿Que pīha acoi mbia? —ehi tēi yuvireco.

¹² Ava rehii pāhuve setá iteanga oñehe yuvireco sese. Amove aipo ehi yuvireco: “Ahe mbia aviye vahe”; ambuae rumo aipo ehi: “Ndahei aviye vahe; ahe rumo ombopa tēi vahe ava” ehi yuvireco.

¹³ Nomboyecuai eté rumo oñehe yuvireco sese güere-cuar sui osiquiyepave.

¹⁴ Pieta mbiterse, Jesús aviyeteramo tēi oique ava pāhuve tūparo pipe ava mbohe. ¹⁵ Judío eta rerecuar evocoyase,

—¡Too, mara ehi rutei! —ehi tēi—. ¿Mara ehi vo co mbahecuá iteanga? ¡Ndoyembohei vahe niha yande yeroquisave! —ehi tēi yuvireco.

¹⁶ Judío rerecuar upe rumo aipo ehi:

—Che porombohesa ndahei cheyesuindar tēi, ahe rumo che mbousar suindar —ehi—. ¹⁷ Que ñepei pe pāhu pendar oyapo potase Tūpa remimbotar, oicuara che porombohesa ndahei vahe che suindar, ahe Tūpa suindar ité. ¹⁸ Esepia, acoi ava oñehe vahe oyesui tēi, ahe ‘tache mboetei ava yuvireco’ ohesave tēi ěgüe ehi. Co ava rumo “tomboetei che mbousar” ehi vahe, ahe supi eté vahe; ndipoi eté porombopasa iporombohesa pipe.

¹⁹ “Moisés niha omondo tēi mborocuita pēu. Que ñepei pe pāhu pendar rumo ndipoi eté omboyeroya vahe. ¿Mahera ru che yuca pota peye?” ehi.

²⁰ —¡Nde erereco carugar ndeyesel! ¿Ava vo nde yuca pota? —ehiño ava eta yuvireco chupe.

²¹ Aipo ehi ava upe:

—Cuese acoi ayapose mbahe mbituhusa ari pipe, ahese, “¡Too, mahera ěgüe ehi!” peyeño acoi cheu. ²² Pe avei rumo amove peporaviqui mbituhusa ari pipe peporombocircuncidase porocuita Moisés omondo vahe reroyasave. (Ahe circuncisión rumo ndahei Moisés suindar, ahe rumo yipive vahe pe ramo suindar ité.) ²³ Oyepotase rumo chíhivahe mbocircuncida āgua mbituhusa ari pipe tupri pēu, peyapoño rane ité mborocuita mboaviye āgua. ¿Mahera ru cheuño pemboasi ñepei mbia mbituhusa ari pipe ambogüera tupri vahe rese? ²⁴ “Oyavi evocoi” peye voi rene catu ava upe; peicua tupri rane ‘¿supi eté pīha?’ pe yapave —ehi Jesús ava eta upe.

Jesús oñehe güecocuer Tūpa suindar rese

²⁵ Evocoyase amove Jerusalén pendar mbia aipo ehi oyeupe yuvireco:

—¿Ndahei vo acoi co oseca tēi yuca āgua yuvireco? —ehi—. ²⁶ Ahe ité co niha co ava pāhuve oñehe oico, ndipoi eté que mara ehi vahe yuvireco chupe. ¿Omoha pīha mborerecuar co mbia Poropĩsirosar seco āgua yuvireco? ²⁷ Yande rumo yaicua que sui turi. Acoi ouse rumo Poropĩsirosar ité coiye, ndipoi chietera que ava oicua vahe iyusa —ehi yuvireco.

²⁸ Evocoyase aipo renduse oporombohe vitesese tūparove, oñehe pīrata aipo ehi:

—¡Pe niha aipo, “Oroicua vahe” peye; “Oroicua avei iyusa” peye cheu! Ndayui rumo che remimbotar sui tēi. Oime rumo che mbousar, ahe seroyapri ité. Ahe pe ndapeicuai vahe. ²⁹ Che rumo aicua ité. Esepia, che ichui ayu iyavei ahe ité che mbou pēu —ehi.

³⁰ Aipo ihese, oipisi pota yuvireco soquenda āgua viña. Aní eté rumo. Esepia, ndoyepota vītei ihari chupe. ³¹ Setá iteanga rumo ava vīroya iyavei aipo ehi yuvireco:

—Ouse Poropĩsirosar, ¿oyapo catura pĩha mbahe poromondiisa co mbia sui? —ehi yuvireco.

Fariseo oyocuai sundao tũparo rãrosareta Jesús pisi ãgua

³² Fariseo eta osendu ava ñehesa Jesús resendar yuvireco. Ahe ité iyavei pahi eta rerecuar omondo sundao tũparo rãrosar Jesús pisi ãgua yuvireco. ³³ Jesús rumo aipo ehi:

—Aicove vitemira pe rese chĩhi rupive. Ipare voi ayevira che mbousar piri vicho —ehi—. ³⁴ Che reca tẽira peye, ndapeicatui chietera rumo che reca. Esepia, ndapeicatui chiaveira peso vaherã che recosave —ehi ava eta upe.

³⁵ Evocoyase judío oporandu-randu oyeupe yuvireco:

—¿Que pĩha aipo osora yande sui seca iriẽhi ãgua? ¿Osora tie que amombri yande mu oñemosai vahe pãhu rupi ambuae ava ndahei vahe yande mu mbohe ãgua? ³⁶ ¿Mara oya pĩha evocoyase aipo, ‘Che reca tẽira peye, ndapeicatui chietera rumo che reca. Esepia, ndapeicatui chiaveira peso vaherã che recosave’ ehi yandeu? —ehi-ehi tẽi oyeupe yuvireco.

Espíritu iai ndopai vahe nungar

³⁷ Pieta ipa, ahe imboeteisa catu vahe, ahe ari pipe Jesús oñhe pĩrata ohã aipo ehi:

—Acoi que ava ihusei vahe, toyugüeru cheu. Che evocoyase tamboihu —ehi—. ³⁸ Esepia, inungar aipo ehi vahe icuachiapri pipe, che reroyasar piha sui osẽra iai ndopai vahe nungar —ehi.

³⁹ ‘Che reroyasar oipisira Espíritu curi’ ohesave aipo ehi. Espíritu rumo ndou vitei ahese. Esepia, Jesús ahese ndoyevi vitei avei güecosa porañetesave.

Ava rehii oyemboyaho Jesús recocuer sui yuvireco

⁴⁰ Osenduse ava rehii aipo nungar, amove aipo ehi:

—Supi eté co mbia Tūpa ñehe mombehusar imombe-
hupri ou vahe —ehi yuvireco chupe.

⁴¹ Ambuae aipo ehi:

—Co Poropĩsirosar ité —ehi yuvireco.

Ambuae rumo aipo ehi yuvireco:

—¿Mahera aipo Galilea sui tēi oura Poropĩsirosar viña?
—ehi—. ⁴² Icuachiapri pipe rumo aipo ehi Poropĩsirosar
oyesura mborerecuar guasu David sui iyavei ahera Belén
pendar, David recua pendar itera —ehi.

⁴³ Evocoyase ava oyemboyaho-yaho yuvireco Jesús
recocuer sui tēi. ⁴⁴ Amove ava viraso pota tēi yuvireco
soquenda; ndipoi eté rumo ěgüe ehi vahe yuvireco chupe.

Judío rerecuar ndoviroyai Jesús yuvireco

⁴⁵ Sundao tūparo rārosar oyevi yuvireco Jesús recosa
sui. Fariseo eta iyavei pahi eta rerecuar evocoyase
oporandu yuvireco chupe aipo ehi:

—¿Mahera vo ndaperui! —ehi yuvireco chupe.

⁴⁶ Sundao tūparo rārosar evocoyase aipo ehi:

—¿Ndipoi eté que ava oñehe vahe ahe mbia nungar! —
ehiño yuvireco.

⁴⁷ Fariseo eta iyavei mborerecuareta evocoyase aipo
ehi yuvireco:

—¿Pe avei eté rumo peyembopa uca chupe? —ehi—
. ⁴⁸ Ndipoi eté niha ore mboetasa mborerecuar iyavei
fariseo viroya vahe yuvireco. ⁴⁹ Co ava rehii tēi ěgüe
ehi yuvireco. Ahe rumo ndoicuai vahe Tūpa porocuita
yuvireco, sese iñemoirosavrive ité yuvirecoi —ehi sundao
tūparo rārosar upe yuvireco.

⁵⁰ Evocoyase Nicodemo, acoi oso vahe pĩtu pipe Jesús
piri, ahe avei eté fariseo pāhuve secoi, ahe aipo ehi:

⁵¹ —Yandeundar porocuita mboaviye āgua ndiyai, “Ereyavi mbahe” yahe voño tēi que ava mbahe sembi-apocuaēhi viteseve —ehi.

⁵² Evocoyase omboyeve yuvireco:

—¿Nde avei tie ereico Galilea pendar? Eyembohe tupri icuachiapri pipe. Ipipe eresepiara ndipoi eté que ñepeu ou vahe Galilea sui Tūpa ñehe mombehúsar —ehi mborere-cuareta Nicodemo upe yuvireco.

Cuña oyemboaguasa tēi vahe resendar

⁵³ Ipare opa yuviraso ñepeu-pei güēta rupi.

8

¹ Jesús rumo oso ivitri Olivo ve. ² Ahere ayihive cōhese, oyeve tūparove. Ahese opacatu ava oyemboya yuvireco sese. Ahe evocoyase oguapi oĩ oporombohe.

³ Evocoyase Moisés porocuita rese oporombohe vahe, fariseo eta avei güeru Jesús upe cuña oyemboaguasa tēi vahe yuvireco ava rehii rovai, ⁴ aipo ehi yuvireco chupe:

—Porombohesar, co cuña iyemboaguasase cuimbahe rese osesapiha ñepeu ava. ⁵ Moisés porocuita rumo ore cuai co nungar cuña yuca āgua ita pipe. ¿Mara ere vo catu nde co nungar upe? —ehi fariseo eta yuvireco chupe.

⁶ Ahe rumo secoāhasave tēi aipo ehi yuvireco ‘toyavi angahu oñehe yandeu’ oya tēi. Ahe rumo oyaivi, ombahecuchía ocuā pipe ivi rese. ⁷ Evocoyase oporandu vitesve ava yuvireco, opūha aipo ehi:

—Que ñepeu pe pāhu pendar ndoyemboangaipai vahe, ahe rane toyapi ita pipe —ehi.

⁸ Oyaivi iri, ombahecuchía ivi rese. ⁹ Osenduse rumo judío rerecuareta, omboipi ñepeu-pei yuvinose yuvireco, cuacua catu vahe sui rane yuvinose. Opacatu yuvinosepase, Jesús güerañomi cuña rese opita yuvireco.

¹⁰ Evocoyase opūhase, ahese aipo ehi chupe:

—Cuña, ¿que que ru ava? ¿Ndipoi eté que ñepei opita vahe nde mocañi ãgua? —ehi

¹¹ —Aní eté, che Yar, ndipoi eté —ehi.

Evocoyase aipo ehi chupe:

—Che avei ndoromocañi tēi potai. Sese cūrítei eso, ereyapo iri eme angaipa —ehi cuña upe.

Jesús tesapesa ava upe secoi

¹² Jesús oñehe iri ava eta upe aipo ehi:

—Che aico tesapesa ava eta upe. Acoi che rupi secoi vahe virecora tesapesa omondo vahe tecovesa apirēhi vahe iyavei ndaseco iri chietera pītumimbisa nungar mbahe-mbahe tēi vahe pipe —ehi.

¹³ Evocoyase fariseo eta aipo ehi yuvireco:

—Nde ereñehe ndeyese ae tēi. Sese nde ñehesa ndaseroyaprii eté —ehi yuvireco chupe.

¹⁴ —Che ñehe rumo supi vahe ité. Yepe cheyese ae añehe viña, che rumo aicua que sui ayu, que asora no. Pe rumo ndapeicuai eté. ¹⁵ Pe peseca ava rembiapo cua tupri ãgua ava tēi pihañemoñeta rupi. Che rumo ndayui evocoi nungar mbahe apo. ¹⁶ Asecase ava rembiapo cua tupri ãgua, ahe supi tupri vahe ité. Esepia, ndahei che ae tēi ěgüe ahe, che Ru, che mbousar rumo secoi che rese. ¹⁷ Porocuaita pēu icuachiapri pipe aipo ehi: “Que oimese ñuvirío ava oyoya tupri omombehu vahe mbahe, ahese voi seroyasara” ehi. ¹⁸ Supi eté che ae ité niha añehe cheyese viña, che Ru, che mbousar, reseve rumo oyoya tupri oroñehe —ehi.

¹⁹ Aipo ihese, oporandu yuvireco chupe:

—¿Que vo aipo nde Ru? —ehi yuvireco.

—Pe ndache cuai eté peye, che Ru avei ndapeicuai. Che cuase rumo peye viña, che Ru avei peicuara viña —ehi fariseo eta upe.

²⁰ Jesús aipo ehi tūparo pīpe, guarepochi monuhapri riru ipive oporombohe ohã. Ndipoi eté rumo ahese osoquenda vaherã. Esepia, ndoyepota vitei eté ahese ihari chupe.

Jesús, “Che sosave pe ndapeicatu chira peso” ehi

²¹ Jesús aipo ehi iri:

—Che asose, che reca tẽira peye. Pe rumo opara pemaño pe angaipa reseve. Che sosave ndapeicatu chiera peso vaherã —ehi.

²² Aipo ihese, judío eta aipo ehi yuvireco:

—¿Oyeyucara pĩha ahe ae; ayeve pĩha aipo ehi yandeu? —ehiño yuvireco chupe.

²³ —Pe rumo ivi pendar peico; che rumo ivatendar ité aico. Iyavei pe co ivi pipendar tẽi avei peico; che rumo ndahei eté co ivi pipendar aico. ²⁴ Sese niha acoi aipo ahe pẽu: “Pemanopaño itera pe angaipa reseve” ahe. Esepia, ndache reroyaise peye, pe angaipa reseve ité pemaño —ehi fariseo eta upe.

²⁵ Aipo ihese,

—¿Ava ité vo nde ereico? —ehiño yuvireco chupe.

—Yipisuipe niha acoi amombehu vichico pẽu. ²⁶ Setá iteanga areco che ñehe ãgua pẽu mbahe pe rembiavi rese. Che mbousar niha supi eté vahe. Ahe ñehe asendu vahe, amombehu opacatu ava upe —ehi fariseo eta upe.

²⁷ Ahe rumo ndosenducuai eté Vu rese iñehese yuvireco. ²⁸ Sese aipo ehi fariseo upe:

—Pesupise rumo Ava Riquehir ivira rese, ahese voi peicuara che recocuer, ahese avei peicuara cheyesui tẽi mbahe ndayapoise; che rumo amombehu che Ru che mbohesa güeraño. ²⁹ Che mbousar niha che rupive ité secoi; ndache reyai eté. Esepia, ayapoño ité mbahe semimbotar yepi —ehi ava eta upe.

³⁰ Aipo ihese, setá iteanga ava viroya yuvireco.

Ava Tũpa rahir ité yuvirecoi vahe iyavei ava angaipa pipe tẽi yuvirecoi vahe

³¹ Evocoyase Jesús aipo ehi judío eta viroyasar upe:

—Peico tuprise che ñehe rupi, peicora che remimbohe supi eté vahe. ³² Peicua aveira mbahe supi eté vahe. Ahe evocoyase pe renosera mbiguai nungar pe recosa sui — ehi.

³³ Judío evocoyase aipo ehi:

—Ore rumo Abraham suindar ité oroico, ndoroicoi vahe ité que ava rembiguai tẽi. ¿Mahera ru aipo nde, “Pesera mbiguai nungar pe recosa sui” ere oreu? —ehiño judío eta yuvireco chupe.

³⁴ Evocoyase aipo ehi:

—Supi eté aipo ahe pẽu: acoi opacatu ava oyemboangaipa vahe, inungar mbiguai tẽi, ãgũe ehi oangaipa rereco yuvireco. ³⁵ Mbiguai tẽi ndahei güereciar rêta pipe nara ité; tahir rumo opitaño itera güêta pipe nara. ³⁶ Sese Tahir pe renosese mbiguai tẽi pe recosa sui, supi eté ndapeico iri mbiguai nungar. ³⁷ Aicua niha Abraham suindar pe recosa. Pe rumo che yuca potaño peye. Esepia, ndaperoyai eté che ñehe. ³⁸ Che niha amombehu che Ru mbahe omboyecua vahe cheu, pe avei peyapo mbahe pe yesupa remimombehu —ehi judío eta upe.

³⁹ —¡Ore yesupa rumo Abraham! —ehi judío eta yuvireco chupe.

—Abraham suindar ité peicose, peyapora mbahe sembiapo nungar viña. ⁴⁰ Che rumo, “Tũpa che mbohe mbahe supi eté vahe rese” ahe tẽi pẽu. Pe evocoyase che yuca potaño ité peye. ¡Abraham rumo ndoyapoi eté co nungar mbahe! ⁴¹ Esepia, pe peyapo mbahe peyesupa rembiapo tẽi eté —ehi.

Evocoyase ava aipo ehi yuvireco:

—¡Ndahei rumo ore oyesu tēi vahe oroico; ore rumo orovireco ñepeño ité ore yesupa, ahe Tūpa! —ehiño yuvireco.

⁴² Evocoyase aipo ehi co judío eta upe:

—Tūpa ité pe yesupase rumo, che raisura peye viña. Esepia, che ayu Tūpa sui. Sese cūrítei cohava aico. Ndahei cheyesui tēi ayu, Tūpa rumo che mbou. ⁴³ ¿Mahera pīha ndapesenducua catui eté mbahe che remimombehu? Esepia, ndapeyapisaca potai eté che ñehe rese. ⁴⁴ Peyesupa niha Caruguar ité, sese niha pe ahe tupri avei peico. Peyapo pota mbahe semimbotar tēi. Esepia, Caruguar yipisuive ité oporoyuca serai vahe. Ndoypoi vahe ité mbahe supi tupri vahe, noñehei avei mbahe supi eté vahe rese. Semirasa iñehe ité. Esepia, semirañete ai vahe ité; ahe ité niha yipindar semira tēi vahe. ⁴⁵ Che rumo añehese mbahe supi tupri vahe rese, ndache reroyai eté peye. ⁴⁶ ¿Ava pīha pe pāhu pendar oicua mbahe che rembiavi? ¡Aní eté! Che añehe mbahe supi eté vahe rese pēu, ¿mahera ru evocoyase ndache reroyai eté peye? ⁴⁷ Acoi ava Tūpa suindar, ahe osendu pota rai iñehe; pe rumo ndahei eté Tūpa suindar peico. Sese ndapesendu potai eté iñehe —ehi Jesús judío eta upe.

*Poropĩ*sirosar yipive catu vahe Abraham sui

⁴⁸ Evocoyase judío eta aipo ehi Jesús upe yuvireco:

—Supi eté, ore oroicua nde Samaria iguar tēi ereico, caruguar ité erereco ndeyese —ehi yuvireco chupe.

⁴⁹ —Che ndarecoi eté caruguar cheyese. Che rumo che Ru amboetei; pe rumo ndache mboetei eté peye. ⁵⁰ Iyavei che ndasecai ava che mboetei āgua. Oime rumo ñepeioipota vahe. Ahe niha omondora ava rembiapo repri chupe. ⁵¹ Supi eté aipo ahe pēu: acoi omboyeroya vahe che ñehe, nomanoi chietera yuvireco —ehi judío eta upe.

⁵² Evocoyase judío omboyeve yuvireco chupe aipo ehi:

—Cūrítei oroicua ité cute nde ererecose carugar ndeyese. Esepia, Abraham iyavei opacatu Tūpa ñehe mombehusar omanopa ité yuvireco. ¿Mahera ru aipo nde, ‘Acoi che ñehe reroyasar nomanoi chietera’ ere?

⁵³ ¿Nde tie ivate catu ereico ore ramoi Abraham sui? Esepia, ahe omano ité iyavei ambuae Tūpa ñehe mombehusar omanopa ité yuvireco. ¿Mbahe angahu vo co evocoyase eremoha ndeyese! —ehi yuvireco chupe.

⁵⁴ —Che ae tēi ayemboeteise mbahe che rembiapo pipe, ahese ndahei chira supi vahe viña. Che Ru rumo che mboetei, chupe ité: “Ore Tūpa” peye. ⁵⁵ Pe rumo ndapeicuai eté. Che rumo aicua. “Ndaicuai” ahese, evocoyase semirañete ai vahe aicora viña inungar pe peico. Che rumo supi eté aicua. Sese niha amboyeroya iñehe. ⁵⁶ Esepia, pe ramoi Abraham oyemboviha ‘asepiara ihari oyepotase’ oya cheu. Osepia ité niha. Sese oviharete ité —ehi judío eta upe.

⁵⁷ Evocoyase judío eta:

—¿Mara erera vo aipo Abraham repia ndererecomi vîteise cincuenta araviter? —ehiño yuvireco chupe.

⁵⁸ —Supi eté aipo ahe pēu: che aicove vahe Abraham yesuēhi vîteiseve —ehi.

⁵⁹ Aipo ihese, oipisipa ita yuvireco yapi āgua. Ahe rumo ahe ramoseve oñemi ava eta pãhuve, osēño ité oso tūparo sui.

9

Jesús ombogüera mbia ohasa suive ndasesapisoi vahe

¹ Jesús oguatase ocar rupi, osepia mbia ohasa suive ndasesapisoi vahe. ² Ore semimbohe oroico vahe, oroporandu chupe:

—Ore mbohesar, ¿mahera pīha co mbia ndasesapisoi eté oha? ¿Oyesupa angaipa sui pīha? ¿Oangaipa sui ae tie? —orohe chupe.

³ —Ndahei eté oangaipa sui, ndahei avei oyesupa angaipa sui; co rumo ěgüe ehi Tūpa mbahe sese mboyecua āgua. ⁴ Sese oime vītese ari yandeu che mbousar poraviquisa apo āgua, iya ité ahe yayapo. Esepia, pītura, ahese ndayaicatui chietera mbahe apo. ⁵ Co ivi pipe che recove vītese rumo, che aico ava upe tesapesa nungar — ehi oreu.

⁶ Aipo ohe pare, ondivi ivive, güendi pipe omoaqui vahe ivi omondo ndasesapisoi vahe resa rese. ⁷ Ipare aipo ehi chupe:

—Eso, tereyovai igua Siloé serer vahe pipe —ehi (ahe serer ‘imondopri’ oya aipo ehi).

Ndasesapisoi vahe evocoyase oso, oyovai. Oyevise ichui, omahe tupri ité. ⁸ Evocoyase sēta ivirindar iyavei ava oicua vahe sesapisoēhise oporanduse guarepochi rese aipo ehi yuvireco:

—¿Ndahei vo acoi co oguapi oĩ guarepochi rese oporandu yepi? —ehi yuvireco.

⁹ Amove ambuae ava aipo ehi:

—Taa, ahe ité —ehi.

Ambuae rumo aipo ehi yuvireco:

—Ndahei ahe. Aviye tupri ité rumo ahe —ehi.

Ahe mbia rumo aipo ehi:

—Taa, che ité niha ahe aico —ehi.

¹⁰ Evocoyase oporandu yuvireco chupe:

—¿Mara ere vo co esareco? —ehi.

¹¹ —Acoi mbia, Jesús serer vahe, ahe omoaquimi güendi pipe ivi, oipichi che resa rese aipo ehi cheu: ‘Eso igua Siloé ve, eyovai’ ehi. Evocoyase aso, ayovaise, ahese amahe tupri ité —ehi.

¹² —¿Que vo ahe mbia? —ehi yuvireco chupe.

—Ndaicuai, ¿que vo catu? —ehiño ava güëta cotindar uve.

Fariseo oporandu ndasesapisoi vahe cuera agüer rese yuvireco

¹³⁻¹⁴ Mbituhusa ari pipe aipo Jesús omoaquimi güendi pipe ivi ndasesapisoi vahe mbogüera ägua. Sese viraso ndasesapisoi vahecuer fariseo eta rovai yuvireco.

¹⁵ Fariseo oporandu iri yuvireco co mbia upe: “¿Mara ere ité vo co esareco?” ehi. Ahe mbia aipo ehi:

—Omondo ivi güendi pipe omoaqui vahe che resa rese. Ichui ayovai. Ipare voi asareco —ehi.

¹⁶ Evocoyase ambuae aipo ehi yuvireco chupe:

—Aipo mbia ndahei eté revo Tüpa suindar. Esepia niha, nomboetei eté mbituhusa ari —ehi yuvireco.

Ambuae evocoyase aipo ehi yuvireco:

—¿Mara ehira aipo poromondiisa apo ava yangaipa vahe viña? —ehiño yuvireco.

Oyeavirati tēi ipihañemoñetasa. ¹⁷ Sese oporandu iri ndasesapisoi vahecuer upe yuvireco aipo ehi:

—Nde no, ¿mara ehi nde pihañemoñeta co mbia rese? —ehi.

Ahe evocoyase aipo ehi:

—Che amoha ité Tüpa ñehe mombehusar secose —ehi.

¹⁸ Ahe fariseo rumo ndoviroyai eté icuerasa yuvireco, oichoho uca rane ité iyésupa yuvireco. ¹⁹ Chupe oporandu aipo ehi:

—¿Pe rahir ité vo co? ¿Ndasesapisoi oha? ¿Mara ehi vo co cūrítei osareco no? —ehi iyésupa upe yuvireco.

²⁰ —Ore rahir ité niha co, ndasesapisoi oha. ²¹ ¿Mara ehi vo catu co cūrítei osareco? iyavei ¿ava vo catu ombogüera? ¡Ndoroiuai eté! Peoporandu chupe. Ocuacua

niha; ahe ae oicua ucara pëu —ehiño iyésupa yuvireco fariseo upe.

²² Iyésupa rumo osiquiyepave tēi aipo ehiño yuvireco. Esepia, fariseo opa ité oyemoingatu yuvireco ava “Jesús Poropĩsirosar secoi” ehi vahe oñemonuhasa sui ñepepe reseve imombo ãgua. ²³ Sese niha iyésupa aipo ehiño yuvireco: “Peporandu chupe. Ocuacua niha” ehiño.

²⁴ Evocoyase fariseo güeru uca iri acoi mbia imbogüer-apri yuvireco, aipo ehi yuvireco chupe:

—Emombehuño oreu Tũpa rovaque mbahe supi tupri vahe. Esepia, ore oroicua ité evocoi mbia angaipa viyar seco rese —ehi.

²⁵ Ahe evocoyase omboyevi chupe:

—Che ndaicuai eté angaipa viyar tie revo. Co güeraño catu che aicua: che ndacheresapisoi vahecuer aico; cūrítei rumo asareco —ehi.

²⁶ Evocoyase oporandu iri yuvireco chupe:

—¿Mbahe vo oyapo ndeu? ¿Mara ehi vo nde mbosareco? —ehi yuvireco chupe.

²⁷ —Amombehu niha acoi pëu. Pe rumo ndache reroyai eté peye. ¿Mahera vo peipota amombehu vite vaherã pëu? ¿Pe avei tie peguata pota supi? —ehi fariseo eta upe.

²⁸ Ahese oñehe rai tēi yuvireco chupe:

—Nde ahe mbia rupindar tēi ereico. Ore rumo yande ramoi aracahendar Moisés rupi oroguata vahe. ²⁹ Esepia, oroicua ité Tũpa oñehese Moisés upe. Aipo mbia rumo ndoroicuai eté que sui osẽ —ehi yuvireco chupe.

³⁰ —¿Mara peye rutei pe ndapeicuai que suindar ahe! Che rumo che mbosareco. ³¹ Supi eté, yaicua Tũpa ndosendui eté ava angaipa viyar ñehe; ava omboetesar iyavei viroyasar ñehe güeraño ité niha osendu. ³² Esepia, ndipoi eté que avañõ tēi ava oyesu sui ndasesapisoi vahe ombogüera vahe. ³³ Ahe rumo ndaheise Tũpa suindar ou

vahe viña, ndoicatui chietera revo mbahe apo viña —ehi fariseo eta upe.

³⁴ Evocoyase fariseo eta aipo ehi yuvireco chupe:

—¿Nde co oangaipa reseve oha vahe tēi, ore mbohe pota mbahe rese eve? —ehi.

Ipare omose ñepeí reseve oñemonuhasa sui yuvireco.

*Jesús reroyasar*ēhi ndasesapísoi vahe nungar tēi

³⁵ Jesús oicua ndasesapísoi vahecuer mombosa. Vupitise aipo ehi chupe:

—¿Ereyeroya nde Ava Riquehir rese? —ehi.

³⁶ Mbía evocoyase aipo ehi chupe:

—Che mbohesar, emombehumi cheu; tayeroya catu ru sese —ehi.

³⁷ —Eremahe niha co sese; che ité ahe aico —ehi ndasesapísoi vahecuer upe.

³⁸ Evocoyase mbía oñenopiha sovai:

—Oroviroya, che Yar —ehi chupe.

³⁹ Ichui aipo ehi:

—Che ayu co ivi pipe mbahe supi tupri vahe apo ãgua; ava ndasesapísoi vahe nungar upe mbahe supi eté vahe che Ru suindar mboyecua ãgua iyavei ava oicua tēi vahe mbahe Tūpa suindar mboesapísoēhi iri ãgua —ehi.

⁴⁰ Evocoyase ambuae fariseo eta yuvirecoi vahe cōimi ichui osenduse aipo ñehesa, oporandu yuvireco chupe:

—¿Ore avei tie ndasesapísoi vahe nungar oroico? —ehi.

⁴¹ Evocoyase omboyeví ahe fariseo upe:

—Peicose ndasesapísoi vahe nungar viña, “Peyavi mbahe” ndehi chietera Tūpa pe angaipa rese pēu viña. Pe rumo, “Ore oroicua tupri Tūpa suindar mbahe” peye tēi. Sese Tūpa, “Peyavi mbahe” ehi eté pēu —ehi Jesús fariseo eta upe.

10

Jesús ovesa rãrosar nungar

¹ “Supi eté aipo ahe pëu: acoi ava co coti rupi tēi yuviroique vahe ovesa rēta pipe, ahe imonda rai vahe tēi yuvirecoi. ² Oique vahe rumo oquendipī rupi eté, ahe sãrosar ité secoi. ³ Oquendipī rãrosar omboi chupe. Evocoyase ovesa rãrosar oñehe serer rupi güeimba ovesa upe senose ãgua sēta sui. Ahe evocoyase oicua iñehe yuvireco. ⁴ Güeimba ovesa renose pare oguata senonde; seimba ovesa evocoyase oguata saquicuerive. Esepia, oicua ité iñehe yuvireco. ⁵ Ndoguatai eté rumo oyarēhi rupi yuvireco; yuvinoña-noñaño ichui. Esepia, ndoicuai eté iñehe” ehi ⁶ omboyoya güecocuer ovesa rãrosar rese. Ava rumo ndosenducuai eté yuvireco.

Jesús ava rãrosar aviye vahe

⁷ Evocoyase Jesús aipo ehi iri: “Supi eté, aipo ahe pëu: che año ité oquendipī nungar aico ovesa upe. ⁸ Opatatu ava yugüeru vahe che renonde, imonda rai vahe nungar tēi yuvirecoi. Ava cheundar rumo ndoviroyai eté yuvireco. ⁹ Che rumo oquenda nungar aico. Acoi oique vahe che rupi, ahera ipĩsiropirã yuvirecoi. Iyavei inungar acoi ovesa oique vahe güēta pipe, ichui osē capihī reca ãgua igua yepī, ēgüe ehira che reroyasar yuvireco.

¹⁰ “Imonda rai vahe rumo omonda ãgua tēi ou, oporoyuca ãgua, mbahe mocañi ãgua tēi avei. Che rumo ayu ‘tovireco ava tecovesa ndopai vaherã ité yuvireco’ viya. ¹¹ Che ité ava rãrosar aviye vahe aico. Sese ayemoin-gatu tupri che recocuer mondo ãgua ava cheundar repirã; ¹² acoi guarepochi repirã tēi oporaviqui vahe rumo, osepia mahembiar oñaro ai vahe, oseyapaño güemiaro, oña oso. Esepia niha, ovesa ndahei eté seimba, ndahei avei eté ahe sãrosar ité secoi. Evocoyase mahembiar oñaro

ai vahe omondî-mondîi eté ipisi ãgua. ¹³ Evocoi mbia oñaño. Esepia, guarepochi repirã tēi oporaviqui. Sese niha ndosaisui eté güemiaro ovesa.

¹⁴⁻¹⁵ “Che rumo ava rãrosar aviye vahe ité aico; che Ru che cua ité. Che evocoyase aicua avei che Ru. Sese che avei aicua che reimba ovesa eta. Ahe avei che cua yuvireco. Che niha amondo che recocuer sepirã yuvireco.

¹⁶ Areco avei ambuae ité che reimba ovesa. Ahe avei aru pota che mboyeroya vaherã yuvireco. Ahese ñepei reseve guasu che remiaro yuvirecoira.

¹⁷ “Che Ru niha che raisu ité. Esepia, amondo itera che recocuer manosave. Ipare rumo acuerayevira.

¹⁸ Ndoicatui chira ava ahe ae tēi che yuca ãgua; che teieté rumo amondora che récocuer che remimbotar rupi eté. Che areco ité pĩratasa imondo ãgua, che cuerayevi iri ãgua avei. Sese ité niha che Ru che cuai” ehi güemimbohe eta upe.

¹⁹ Osenduse judío eta aipo nungar ñehesa, opa ipihañemoñeta yoavirati yuvireco. ²⁰ Setá iteanga ipãhu pendar aipo ehi:

—¿Mahera vo co pemboyeroya? Vireco ité carugar oyese, ndayaracuai eté —ehi yuvireco chupe.

²¹ Ambuae rumo aipo ehi yuvireco:

—Ndipoi eté rumo que ava na ehi vahe oñehe carugar rerecosar. ¿Omboesapiso tie carugar rerecosar ava? — ehi amove judío yuvireco Jesús upe.

Judío rerecuar ndoyambotai Jesús yuvireco

²² Ari sōhisa vahe pipe tecua Jerusalén ve tũparo rovasagüer pieta oyepota. ²³ Ahese Jesús oguata oico tũparo Salomón oyapo vahecuer rocupe ivii rupi.

²⁴ Evocoyase judío rerecuareta oyere tupri yuvireco sese aipo ehi yuvireco chupe:

—¿Marase rutei vo eremombehu tuprira Poropĩsirosar nde recosa oreu? Emombehu tupri catu ñepei reseve oreu —ehi yuvireco chupe.

²⁵ —Amombehu niha acoi pẽu, ndache reroyai eté rumo peye. Mbahe ayapo vahe che Ru mborerecuasa pipe omboyecua ité Poropĩsirosar che recosa; ²⁶ pe rumo ndache reroyai eté peye. Esepia, pe ndahei eté che remiaro ovesa peico. ²⁷ Che remiaro ovesa rumo oicua che ñehe. Che avei aicua ahe yuvireco. Ahe evocoyase che rupi oguata yuvireco. ²⁸ Amondo avei tecovesa apirẽhi yuvireco chupe icañiẽhi ãgua; ndipoi chietera que ava virocua iri vaheã che sui. ²⁹ Che Ru niha ombou cheu. Esepia, ahe ipĩrata catu opacatu ava sui. Ndipoi chietera que ñepei ava oicatu vahe serocua che Ru sui. ³⁰ Che Ru iyavei che oroico ñepeiño ité —ehi judío rerecuareta upe.

³¹ Aipo ihese, judío rerecuareta osupipa iri ita yuvireco yapi ãgua. ³² Ahe chupe rumo aipo ehi:

—Setá mbahe poromondiisa aviye vahe pe rovaque ayapo che Ru pĩratasa pipe. ¿Uma che rembiapo aviye vahe sui che api-api pota peye ita pipe? —ehi judío rerecuareta upe.

³³ Judío rerecuareta omboyevi yuvireco chupe:

—Nande api-apisai chira ita pipe que mbahe nde rembiapo aviye vahe rese. Co rese rumo ãgüe orohera ndeu. Esepia, nde ereñehe rai tẽi Tũpa rese. Nde moco ava tẽi ereico. Nde rumo ereyeapo Tũpa ndeyeupe ae —ehi yuvireco chupe.

³⁴ Evocoyase aipo ehi ahe ava upe:

—Pẽundar mborocuaita icuachiapri pipe niha aipo ehi: ‘Che aipo ahe pẽu: pe tũpa pãve ité peico’ ehi. ³⁵ Yaicua niha icuachiapri pipendar ndiyai yayamotarẽhi. Esepia, Tũpa aipo ehi: ‘Pe tũpa pãve ité peico’ ehi evocoi ava oñehe pìsarisar upe. ³⁶ Che niha che Ru Rembiporavo aico.

Ahe che mbou co ivi pīpe. ¿Mahera ru evocoyase, ‘Nde ereñehe rai tēi Tūpa rese’ peye cheu, ‘Che Tūpa Rahir aico’ ahese pēu? ³⁷ Esepia, acoi ndayapoise mbahe che Ru remimbotar, ahese ndache reroyai chietera peye viña. ³⁸ Yepe ndache reroyai chira che recocuer rese peye viña, mbahe ayapose rumo ahe tēi peroyara. Sese tapeicua ñepei reseve che Ru secoise che rese iyavei che sese che recosa —ehi oamotarēhimbareta upe.

³⁹ Osoquenda pota iri yuvireco viña; Jesús rumo osoño ipāhu sui.

⁴⁰ Oyevi iai Jordán rovai. Aheve acoi Juan yipindar oporoãpiramo. Aheve opita. ⁴¹ Ava rehii yuviraso sepia, aipo ehi yuvireco:

—Yepe Juan ndoyapoi mbahe poromondiisa viña. Opacatu mbahe omombehu vahe rumo co mbia resendar supi eté —ehi yuvireco.

⁴² Setá iteanga ava Jesús viroya yuvireco aheve.

11

Lázaro mano agũer

¹ Oime ava imbaheasi vahe serer Lázaro, tecua Betania pendar. Güeindri Marta iyavei María reseve yuvirecoi aheve. ² Ahe María, oipiyere vahe mbahe sñacua vahe yande Yar pī rese. Ipare oiquiti oha pīpe. ³ Ahe seindri omondo oñehe Jesús upe yuvireco aipo ehi:

—Ore Yar, nde mboripar, nde rembiaisu, imbaheasi ou —ehi.

⁴ Ahe osenduse aipo ehi:

—Co mbaherasisa rumo ndahei ahe imano āgua ité. Ñgüe ehi rumo Tūpa reco porañetesa mboyecua āgua iyavei Tahir reco porañetesa mboyecua āgua avei —ehi.

⁵ Yepe osaisú iteanga Marta icupihir reseve iyavei iquivrí Lázaro viña, ⁶ oyanduse rumo Lázaro mbaherasisa,

opita viteño ité ñuvirío ari güecosave. ⁷ Ipare omombehu ore supi oroico vahe upe:

—Yavevi iri ivi Judea rupi —ehi.

⁸ Ore rumo aipo orohe chupe:

—Ore mbohesar, cuesemi tēi acoi judío rerecuareta ahe pendar nde yuca pota ita pipe yuvireco; ¿cūrítei co ereso pota iri aheve? —orohe chupe.

⁹ Oreu rumo aipo ehi:

—Ñepeí ari niha vireco doce hora. Supi eté acoi oguata vahe ari pipe ndoyepiapi eté. Esepia, osepia ité co ivi resapesa; ¹⁰ acoi oguata vahe rumo pĩtu pipe, oyepiapi eté. Esepia, ipane tesapesa chupe —ehi oreu.

¹¹ Ipare aipo ehi:

—Yande mboripar Lázaro oque tēi. Che rumo amomahera —ehi.

¹² Evocoyase ore aipo orohe chupe:

—Ore Yar, oque tēise, ocuerara —orohe.

¹³ ‘Omano ité’ oyapave tēi aipo ehi. Ore rumo orepihañemoñeta: “Oque tēi revo” orohe chupe viña.

¹⁴ Ipare rumo omombehu tupri ité aipo ehi oreu:

—Lázaro omano ité. ¹⁵ Aviharete che ndaicoise aheve. Esepia, ãgiue ehise ité aviye catura pēu pe che reroya ãgua. Yaso ru catu sepiá —ehi oreu.

¹⁶ Evocoyase Tomás, Gemelo serosa vahe, aipo ehi ore imboetasa oroico vahe upe:

—Yaso avei ru yande yamano vaherã supi —ehi.

Jesús cuerayevisa secoi iyavei tecovesa

¹⁷⁻¹⁸ Betania namombriimi Jerusalén sui, tres kilómetro tupri. Evocoyase ore oroyepota senise ahe tecuave, orosendu “cūrítei irungatu ari opa Lázaro tĩre” ehi vahe.

¹⁹ Setá judío yuviraso Marta iyavei María piri iquivri mano agüer sui imboviha ãgua. ²⁰ Oicuase Marta Jesús yepota

seni, oso voi eté sapeve; María rumo opitaño oi pipe.

²¹ Evocoyase Marta aipo ehi voi chupe:

—Che Yar, ehi cohava ereicose, nomanoi chietera revo ore quivri viña. ²² Che rumo aicua Tüpa omboura opacatu nde porandusa ndeu —ehi Marta chupe.

²³ —Nde quivri rumo ocuerayevi irira —ehi Marta upe.

²⁴ —Supi eté aicua niha ocuerayevira opacatu omano vahecuer reseve ari ipa vahe pipe —ehi Marta.

²⁵ —Che niha cuerayevisa aico iyavei tecovesa. Acoi ava che reroya vahe, yepe omano tẽira viña, oicoveño itera rumo. ²⁶ Acoi che reroya vahe güecoveseve, nomanoi chietera. ¿Eroya aipo che hesa? —ehi Marta upe.

²⁷ —Oroviroya ité, che Yar. Nde niha Poropĩsirosar ereico Tüpa Rahir, ore remiaro ereyu vaherã co ivi pipe oreu nara —ehi Marta Jesús upe.

Jesús oyaseho Lázaro ruvípa rovai

²⁸ Aipo ohe pare, Marta oso ocupihir María reca, chupeñomi aipo ehi:

—Porombohesar oicove cohava, “Tou” ehi ndeu —ehi chupe.

²⁹ Evocoyase María oso voi eté sepia. ³⁰ Jesús rumo ndoique vitei eté tecua pipe; Marta rese oyoepiasave viteño ité seci. ³¹ Osepiase María sã poyava, judío eta sõtave yuvirecoi vahe imboviharasar yuviraso voi saquicuerive, “Oquivri ruvípave revo osora oyaseho” ehi yuvireco viña.

³² Evocoyase María oyepotase chupe, oñenopiha sovai aipo ehi:

—Che Yar, ehi revo ereicoveño itese cohava, che quivri nomanoi chietera viña —ehi María chupe.

³³ Osepiase María yaseho iyavei judío eta yuviraso vahe supi, opiha pipe oyandu ité oviharẽhisa. ³⁴ Evocoyase oporandu:

—¿Que vo peñoti? —ehi chupe.

Ahe aipo ehi yuvireco chupe:

—Ore Yar, erio, teresepia —ehi.

³⁵ Ahesé Jesús oyaseho. ³⁶ Judío evocoyase aipo ehi yuvireco:

—¿Esepia, osaisu ité! —ehi oyeupe yuvireco.

³⁷ Ambuae rumo ipãhu pendar aipo ehi yuvireco:

—Co mbia omomahe vahe acoi mbia ndasesapisoi vahe, ¿ndoicatui chira pĩha Lázaro manoëhi ãgua mbahe apo cuese rahe viña? —ehi yuvireco.

Lázaro mbogüerayevi agüer

³⁸ Jesús oyemboya suvipave oviharëhisa pipe; ahe suvipa ita hopri, sovapisa ita avei.

³⁹ —Perocua sovapisa ita ichui —ehi.

Marta, omano vahe reindri, rumo aipo ehi:

—Che Yar, iné ité revo. Esepia, opa niha irungatu ari imanore —ehi.

⁴⁰ —¿“Che reroyase eve, Tüpa pĩratasa eresepiara” ndahei vo acoi ndeu? —ehi Marta upe.

⁴¹ Aipo ihe pare, virocua ita yuvireco ichui. Evocoyase omahe iva rese aipo ehi:

—Che Ru, “Aviye ndeu” ahe ndeu. Esepia, eresendu che ñehe. ⁴² Che aicua nde eresenduño ité che ñehe yepi, che rumo aipo ahe co ava eta rembiepiave ‘toviroya avei nde che mbousa co ivi pipe yuvireco’ che yapave —ehi.

⁴³ Aipo ohe pare, oñehe pĩrata aipo ehi:

—¿Lázaro, esë eipeve sui! —ehi.

⁴⁴ Omano vahe evocoyase osë voi opacatu turucuar omamasa reseve. Jesús evocoyase aipo ehi ava upe:

—Peyorapa imamasa ichui, toguata —ehi.

Judío rerecuareta oyemomborandu Jesús pisi ãgua yuvireco

⁴⁵ Osepiase co poromondiisa, judío eta yuviraso vahe María rupi setá ité Jesús viroya yuvireco. ⁴⁶ Ipãhu pendar rumo moviro yuviraso voi ava fariseo rerecuareta uve sembiapo mombehu água. ⁴⁷ Evocoiyase fariseo rerecuareta iyavei pahi rerecuareta oñemonuha guasu yuvireco aipo ehi:

—¿Mara yahera vo sereco? Co mbia setá ité oyapo poromondiisa oico. ⁴⁸ Ndayayapoise mbahe chupe, opacatu tiête ava viroyara yuvireco viña iyavei aviyeteramo mborerecuar Roma iguar yanduse, yugüerura yande tũparo mondurupa iyavei omocañi tẽi uca aveira yande recua yande sui —ehi oyeupe yuvireco.

⁴⁹ Ñepei rumo mbia ipãhu pendar Caifás serer vahe, ahe ité pahi eta rerecuar ivate catu vahe ahe araviter pipe, aipo ehi ava upe:

—Pe ndapeicuai eté mbahe, ⁵⁰ ndapesenducuai avei co tecocuer; aviye catura ñepei mbia omanose yande recocuer rese, ndahei que opacatu yande mocañi tẽi água —ehi omboetasa eta upe.

⁵¹ Ahe rumo ndahei oyesui tẽi aipo ehi; Tũpa ité aipo ombohe uca. Esepia, ahe ité mborerecuar guasu chini ahese. Sese aipo ehi: “Jesús omanora yande recocuer rese” ehi. ⁵² Iyavei ndahei chira ahe ava reseño, omanora opacatu ava Tũpa Rahir oñemosai tẽi vahe ñepei reseve imonuha água. ⁵³ Ëgüe ehi ahe ari pipeve judío eta rerecuar oyemoingatupa voi yuca água yuvireco.

⁵⁴ Sese ndoguata iri ava judío eta pãhu rupi. Ahe rumo osẽ ivi Judea sui, oso ivi iporupirẽhi vahe rerovicave, tecua Efraín ve. Aheve opacatu oropita supi.

⁵⁵ Virovise judío Pascua pieta apo água, setá iteanga ava ambuae tecua rupindar yuviraso tecua Jerusalén ve oyecocuer moatiro ahe pieta mboetei água renondeve.

⁵⁶ Oseca tēi Jesús yuvireco. Ipare tūparove yuviroiquese, oporandu-randu oyeupe yuvireco:

—¿Mara peye pe, oura pīha pieta repia, aní chira tie? —ehi-ehi oyeupe yuvireco.

⁵⁷ Yipive rumo fariseo rerecuar iyavei pahi rerecuar oyocuai ava, “Pesepiase Jesús, pemombehu voi oreu ipisi āgua” ehi yuvireco chupe.

12

Ñepeí cuña omondo Jesús rese mbahe sñacua vahe

¹ Seis arí ipane vitesse Pascua pieta āgua, Jesús oso tecua Betania ve, aheve acoi Lázaro ombogüerayevi.

² Eipeve ocaru yuvireco Jesús mboeteisave. Marta ihañeco sese; Lázaro evocoyase ocaru yuvinoi mesave ipiri.

³ Evocoyase María güeru medio litro mbahe sñacua vahe nardo, sepí iteanga vahe. Omondo ipi rese. Ipare oiquiti ohavapri pipe ichui. Sñacuá iteanga evocoyase opacatu oi pipe. ⁴ Evocoyase ore mboetasa Judas Iscariote, ahe acoi omondo vaheṛā ava yamotarēhimbar uve, aipo ehi:

⁵ —¿Mahera vo ndimondosai co mbahe sñacua vahe tresciento denario rupi ava iparaisu vahe pītivii āgua? —ehi.

⁶ Judas rumo ndahei ava iparaisu vahe raisupave aipo ehi. Ahe rumo imonda rai vahe tēi. Setá rupi guarepochi virocua güembiporuguā tēi. ⁷ Evocoyase Jesús aipo ehi:

—Toyapoño cheu. Esepia, ahe che mano āgua renonde ěgüe ehi cheu. ⁸ Yuvirecoveño itera ava iparaisu vahe pe pāhuve yepi; che rumo ndaico pucu iri chira pe pāhuve —ehi Judas upe.

Pahi rerecuar oyamotarēhi Lázaro yuvireco

⁹ Setá iteanga ava judío oyandu yuvireco Jesús rerācua Betania ve secoise. Sese yuviraso aheve; ndahei Jesús

repia güeraño yuviraso, ãgüe ehi rumo imbogüerayevipri Lázaro repia avei. ¹⁰ Evocoyase pahi rerecuar, “Yayuca avei Lázaro” ehi yuvireco oyeupe. ¹¹ Esepia, ahe ichui tēi niha setá iteanga judío oyepepi pahi rerecuar sui Jesús reroya āgua yuvireco.

Jesús oique Jerusalén pipe

¹² Ava rehii yuviraso tecua Jerusalén ve Pascua pieta repia yuvireco. Ahere ayihive voi oicua Jesús yepota āgua ahe tecuave yuvireco. ¹³ Ahese oyasia pindo yuvireco. Oyacatu viraso Jesús rovaichi āgua, osapucaí yuvireco chupe:

—¡Imboeteipri, sovasapri secoi ou vahe yande Yar Tūpa rer pipe! ¡Tūpa tosovasa Israel rerecuar guasu! —ehi yuvireco.

¹⁴ Yipindar rumo opa Jesús oseca uca guaricumi. Ipare oyeupi sese icuachiapri aracahendar rupi tupri ité aipo ehi vahe:

¹⁵ “Pesiquiyei rene, Sión pendar; pesepia, pe rerecuar guasu guaricumi harive ou pēu” ehi.

¹⁶ Yipindar, ore semimbohe eta, ndorosenducuai eté co aracahendar imombehupri. Ipare rumo oyevise güecosa porañetesave, ahese oremahenduha aracahendar sesendar icuachiapri rese, “Supi eté omombehu” orohe tēi sepiase.

¹⁷ Acoi ava yuvirecoi vahe Jesús rupi, Lázaro mbogüerayevisa osepia vahecuer, ahe opa omombehu-mbehu ambuae ava upe yuvireco. ¹⁸ Sese ava eta yuvinose voi sovaichi ipisi āgua. Esepia, oicua ité ahe mbahe poromondiisa guasu yapose yuvireco. ¹⁹ Evocoyase fariseo rerecuareta aipo ehi oyeupe yuvireco:

—Indó, peicua niha ndayaicatu iri eté mbahe apo chupe cute. Pesepia ru, ¡opacatu guasu ité ava oguata cūritei yuvireco supi! —ehi yuvireco.

Oime griego oseca vahe Jesús yuvireco

²⁰ Griego oime ava rehii pâhuve yuviraso vahe pieta repia Tûpa mboetei âgua tecua Jerusalén ve. ²¹ Ahe oyemboya Felipe, Betsaida pendar rese, ahe tecua Galilea pîpendar. Ipare aipo ehi yuvireco chupe:

—Nde mbia, orosepia potami aipo Jesús —ehi.

²² Felipe evocoyase oso imombehu Andrés upe; ichui yuviraso ñuvirío voi Jesús upe imombehu. ²³ Evocoyase chupe aipo ehi:

—Oyepota ari cheundar che, Ava Riquehir, che yevi iri âgua che recua porañetesave. ²⁴ Supi eté aipo ahe pëu: inungar acoi trigo rãhii nañotisaise, ahese ndihai chietera; ñotise rumo, ahese iha vaira. ²⁵ Acoi ava osaisuse rumo güecocuer tēi, ocañi tēira; acoi ndosaisui vahe rumo güecocuer co ivi pîpendar tēi che recocuer rese, evocoi nungar virecora tecovesa apirēhi. ²⁶ Acoi ava che mboyeroya pota vahe, toguata che rupi yuvireco. Esepia, acoi che mboyeroyasar yuvirecoi vahe, ahe avei yuvirecoira che piri ivave. Che Ru Tûpa evocoyase omboeteira ahe sereco —ehi chupe.

Jesús omombehu omano âgua

²⁷ “¡Cūrítei ayandu ité mbahe-mbahe tēi oime vaherã cheu! ‘¿Mara ahera pïha?’ ahe tēi. ¿Aipo ahera: ‘Che Ru, che pïsiro eve cūrítei cheu oime vaherã mbahe tēi sui’ ahera viña? ¡Che rumo aicua evocoi nungarã ité ayu!
²⁸ Che Ru, emboyecua nde pïratasa nde rer porañetesa mboetei âgua” ehi oyerogui.

Ichui oyeendu iva sui ñehesa aipo ehi vahe: “Ëgüe ahe niha amboyecua che pïratasa vichico, ãgüe ahe iri aveira” ehi.

²⁹ Aheve ava yuvirecoi vahe, “Osunu revo” ehi yuvireco viña; ambuae ava,

—Tûpa rembiguai revo oñehe Jesús upe —ehi yuvireco.

³⁰ Evocoyase aipo ehi ava eta upe:

—Ndahei cheundar ñehesa pesendu, ahe rumo pẽundar. ³¹ Cũritei oimera ñemoĩrosa co ivi pipendar ndache reroyai vahe upe, cũritei avei imombosara Caruguar co ivi pipendar imborerecuasa sui. ³² Acoi che rupise ivate, opacatu ava arura cheyeupi —ehi.

³³ Aipo ñehesa pipe omboyecua tupri ité mara ehira omano. ³⁴ Aipo ihese ava eta aipo ehi:

—Ore rumo orosendu mborocuaita icuachiapri pipe aipo ehi vahe: “Poropĩsirosar apirẽhi vaheĩ ité” ehi. ¿Mahera ru aipo nde: “Ava Riquehir osupira ivate yuvireco” ere no? ¿Uma ru aipo Ava Riquehir, ambuae tie? —ehi ava eta yuvireco chupe.

³⁵ Evocoyase aipo ehi ava upe:

—Pe pereco vitemira chĩhi rupive tesapesa pe pãhuve. Peguata catu supi seime viteseve. Aviyeteramo pe resapiha tẽira pĩtumimbi vahe. Esepia, acoi oguata vahe pĩtumimbisa rupi, ndoicuai que güecosa. ³⁶ Peroya co tesapesa cũritei pereco viteseve, ipipe ité pe reco ãgua —ehi.

Aipo ohe pare, Jesús osẽ ava rehii pãhu sui; ndoyemboyecua iri chupe.

Setá judío rerecuar ndoviroya vitei eté Jesús yuvireco

³⁷ Yepe Jesús setá iteanga oyapo mbahe poromondiisa judío rerecuar rovaque viña, ahe rumo ndoviroyai eté yuvireco. ³⁸ Esepia, imboaviyesa rane itera Tũpa ñehemombehusar Isaías rembicuachiagüer aipo ehi vahe:

“Che Yar, ava ndoviroyai yande ñehemombehusar yuvireco iyavei ndoviroyai nde pĩratasa eremboyecuase chupe” ehi.

³⁹ Co rese avei ava ndoicatui eté senducua yuvireco. Inungar oicuachía Isaías aipo ehi:

⁴⁰ “Tūpa nomboesapisoi ava iyavei nombopïhañemoñeta tupri iri mbahe rese yuvireco.

Sese ndosepiacuai eté mbahe, ndosenducuai avei mbahe, ndoyevi catui yuvireco chupe ombogüera ãgua” ehi.

⁴¹ Isaías aipo ehi. Esepia, osepia ité Jesús reco porañetesa. Evocoyase ahe oñehe sese.

⁴² Setá ité rumo judío viroya yuvireco, seco ivate vahe avei. Ahe rumo nomboyecuai eté seroyasa yuvireco fariseo rerecuar sui osiquiyepave ‘aviyeteramo yande mombora ñemonuhasa sui ñepei reseve yuvireco’ oya.

⁴³ Esepia, ahe oipota catu ava tēi suindar yemboeteisa Tūpa suindar yemboeteisa sui yuvireco.

Jesús ñehe reroyasa rese porandusara

⁴⁴ Yipindar rumo, Jesús oñehe vïtese ava rehii upe, oñehe pïrata aipo ehi: “Acoi che reroya vahe ava, ndahei che güeraño che reroya, ahe rumo che Ru avei, che mbousar, viroya yuvireco. ⁴⁵ Iyavei acoi che repia vahe, che mbousar avei osepia. ⁴⁶ Che tesapesa aico. Ayu co ivi pipe ava che reroyasar pïtumimbisave yuvirecoiēhi ãgua. ⁴⁷ Acoi osendu vahe che ñehe, nomoinguei vahe rumo oyese, ndahei che amocañira. Esepia, ndayui ava co ivi pipendar mocañi ãgua, che rumo ayu ipïñiro ãgua.

⁴⁸ Acoi ava che reroïro vahe, ndoviroyai vahe avei che ñehe, oime rumo imocañi ãgua: Co che ñehesa supi eté vahe reroyaēhisa pipe oyemocañi ucara ari ipa vahe pipe. ⁴⁹ Esepia, che nañehei eté cheyesui tēi; che Ru, che mbousar rumo che cuai che ñehe ãgua, che porombohe ãgua avei. ⁵⁰ Che aicua co cheundar porocuita güeru tecovesa apirēhi ava upe. Sese niha amombehu che Ru che cuaisa” ehi Jesús ava rehii upe.

13

Jesús oyosei güemimbohe pi

¹ Pascua pieta renonde Jesús oicua ité ohari yepota co ivi reya āgua oso vaheṙā Vu piri. Ahe osaisu vahe ité ava oyeupendar co ivi piṙe yepi. Ēgüe ehi saisu ari ipa vahe rupi.

²⁻⁴ Carugar oiṙe ité Simón rahir, Judas Iscariote, piṙa piṙe imondo āgua yamotarēhimbar uve. Jesús rumo oicua ité Vu Tūpa sui ousa, oicua avei oyevi iri āgua Vu Tūpa piri iyavei Tu omondo opacatu omborerecuasa chuṙe. Sese ocaruse güemimbohe eta reseve, mesa sui opūha, oseṙui oturucuar yohasa. Ipare omonde ambuae turucuar vumbicuasa rese. ⁵ Evocoyase omondo i yepoisa riru piṙe, oyosei güemimbohe pi, omombiru turucuar vumbicuasa rese viṙeco vahe piṙe oico.

⁶ Ichui Simón Pedro pi oyosei potase, ahe aipo ehi chuṙe:

—Che Yar, ¿nde co ereyoseira che pi? —ehi chuṙe.

⁷ —Nde rumo nderesenducuai mbahe che rembiapo cūritei. Ipare rumo eresenducuaṙa —ehi Pedro uṙe.

⁸ Pedro rumo aipo ehi chuṙe:

—iChe pi rumo ndereyosei chietera! —ehi.

—Ndayoseise rumo nde pi, ndahei chietera evocoyase che rupindar ereico —ehi Pedro uṙe.

⁹ Pedro evocoyase aipo ehi:

—iChe Yar, aní catu che pi año ereyosei; eyosei che po, che rova avei! —ehi chuṙe.

¹⁰ —Acoi oyasupa ramo vahe rumo, ahe ndiquihai eté. Sese ndiyai oyasu iri. Ipi güeraño rumo iya yoseisa. Ēgüe peye ndipoi eté mbahe pe rese; ndaopacatui rumo ēgüe peye —ehi.

¹¹ Ahe aipo ehi: “Ndaopacatui rumo ēgüe peye” ehi. Esepia, oicua ité uma omondora yamotarēhimbar uṙe.

¹² Güemimbohe pi sei pare, omonde iri oturucuar yohasa, oguapi mesave aipo ehi:

—¿Peicua vo co mbahe ayapo vahe pëu? —ehi—. ¹³ Pe niha, “Ore mbohesar, ore Yar” peye cheu. Supi eté niha. Esepia, ahe ité che aico. ¹⁴ Yepe supi eté, che pe mbohesar, pe Yar avei aico viña, ayosei rumo pe pi. Sese pe avei ñepe-pe peyacatu peyosei aveira pe pi. ¹⁵ Che niha ‘na tehi avei yuvireco’ viya opombohe pe rereco, ëgüe ahe pëu. ¹⁶ Supi eté aipo ahe pëu: ava mbiguai tëi, ahe ndahei ivate catu güerecuar sui; ëgüe ehi avei imboupri ndahei ivate catu secoi ombousar sui. ¹⁷ Pesenducua se co nungar mbahe, peyapo tuprise, ahese peviharete catura peico —ehi.

¹⁸ “Che nañehei opacatu pe rese, che rumo aicua uma yuvirecoi vahe che rembiporavo. Icuachiapri rumo yaviyera: ‘Acoi ocaru vahe che piri, oyemboyere che amotarëhi’ ehi vahe. ¹⁹ Senondeve amombehu pëu. Evocoyase ëgüe ehise ité cheu, che reroyara peye che ité niha aipo ahe vahe vichico. ²⁰ Supi eté aipo ahe pëu: acoi che remimondo oipisi tupri vahe, ahe che pisi tupri avei; acoi ava che pisi vahe, oipisi tupri avei che Ru yuvireco” ehi.

Jesús omombehu: “Ñepe pe pãhu pendar che mondora che amotarëhimbar upe” ehi

²¹ Aipo ohe pare, Jesús ndoyembovïhai eté iyavei mbahe oime vahe rã omboyecua tupri ité,

—Supi eté aipo ahe pëu: ñepe pe pãhu pendar che mondora che amotarëhimbar upe —ehi.

²² Evocoyase ore oromahe-mahe tëi ore yese, “¿Ava upe pïha aipo ehi?” orohe tëi ore yeupe. ²³ Che sembiaisu catu yípive acaru vïte. ²⁴ Ipare Pedro oyaiti-iti ‘¿Ava upe vo aipo ere? tehi chupe’ oyapave cheu. ²⁵ Evocoyase che asiri catu irimi yípive, aporandu chupe:

—Che Yar, ¿ava ité vo? —ahe.

²⁶ Ahe aipo ehi cheu:

—Cūrítei amoaquira pan rahicuer imondo tohu, ahe ité che mondora —ehi cheu.

Aipo ohe pare omoaqui pan rahicuer imondo Simón Iscariote rahir, Judas, upe. ²⁷ Judas oipisise pan, oguapi voi eté Carugar sese. Evocoyase aipo ehi Judas upe:

—Evocoi ereyapo pota vahe, eyapo voiño ité ru —ehi chupe.

²⁸ Que ñepei rumo mesave orocarú vahe, ndorosen-ducuai eté aipo ihesa. ²⁹ Esepia, Judas guarepochi riru rãrosar secoi yepi. Sese amove ore pãhu pendar ipihañemoñeta: “ ‘Tererocua mbahe pietase nara’ anise, ‘emondo mbahe ava iparaisu vahe upe nara’ aipo oya revo omose imondo” ehi yuvireco chupe viña.

³⁰ Pan pisi pare, Judas osẽ voi eté oso pĩtuse.

Porocuita ipiasu vahe

³¹ Judas sẽ pare, Jesús aipo ehi:

—Cūrítei oyecuara che, Ava Riquehir, reco porañetesa. Che Ru Tũpa reco porañetesa avei oyecuara che rese.

³² Acoi amboyecuase che Ru Tũpa reco porañetesa, ahe avei omboyecuara che reco porañetesa, ãgũe ehira imboyecua pĩhaivi. ³³ Che rahireta, che rembiaisu, ndaico pucu iri chira pe rese. Che reca tẽira peye; inungar acoi judío rerecuar upe aipo ahe: “Ndiyai chietera peso che sosave” ahe. ³⁴ Sese co amondo porocuita ipiasu vahe pẽu ñepei-peí peyeaisu ãgua inungar che opoaisu.

³⁵ Peyeaisuse ñepei-peí, opacatu tuprĩ ité ava oicuara yuvireco che remimbohe supi eté pe recosa —ehi.

Jesús, “ ‘Ndaicuai eté co mbia’ erera cheu” ehi Pedro upe

³⁶ Pedro oporandu Jesús upe:

—Che Yar, ¿que vo aipo eresora? —ehi chupe.

Ahese omboyevi Pedro upe:

—Cūrítei ndiyai peso vaherã che sosave che rupi; pesorera rumo che rupi curi —ehi.

³⁷ —Che Yar, ¿mahera ru cūrítei voi ndiyai nde rupi che so ãgua? ¿Ayemoingatu ité amano vaherã nde rese! —ehi Pedro chupe.

³⁸ —¿Supi eté pñha ereyemoingatu ité che rese nde mano ãgua? Nde rumo cõhe potase tacura ñehe renondeve, mbosapí oyupagüer rupi, “Ndaicuai eté co mbia” erera cheu —ehi Pedro upe.

14

Jesús, Tũpa raper yandeu

¹ Ipare Jesús aipo ehi opacatu oreu: “Pepihañemoñeta atii rene; peyeroya Tũpa rese, che rese avei peyeroya. ² Esepia, che Ru rētave setá oime pe reco ãgua; êgüe ndehise rumo, namombehui chira aipo pñu viña. Sese che asora pe recuarã moingatu. ³ Imoingatu pare ayevira pe reca che recosave pe reraso ãgua cheyepiri. ⁴ Pe peicua que vo asora iyavei peicua mara peyera pe yepota ãgua che recosave” ehi oreu.

⁵ Tomás rumo aipo ehi chupe:

—Che Yar, ndoroicuai rumo que vo eresora. ¿Mara orohera vo aipo icua ore so ãgua? —ehi.

⁶ —Che niha peri aico supi eté vahe iyavei tecovesa. Che rupi güeraño ité peyepotara che Ru upe —ehi—. ⁷ Pe peicua tuprise ité che recocuer viña, peicua aveira che Ru viña no. Cūrítei suive rumo peicua, pesepia avei cute —ehi oreu.

⁸ Evocoyase Felipe aipo ehi chupe:

—Che Yar, torosepia ité ru aipo nde Ru. Ahese aviyera oreu —ehi.

⁹ —Felipe, setá ari aico pe rese, ¿ndapeicua vitei eté vo che recocuer? Acoi ava che repia vahe, ahe osepia ité che Ru; ¿mahera ru evocoiyase, “Torosepia rane ité nde Ru” ere vite cheu no? ¹⁰ ¿Ndache reroyai vo peye che Ru rese ité aicose, che rese avei che Ru secoise? Opacatu mbahe amombehu vahe pëu, ndahei cheyesui tēi amombehu. Che Ru secoi vahe che rese, ahe ité oyapo güemimbotar che recocuer rese —ehi—. ¹¹ Che reroya peye che Ru rese che recose, ahe avei secoise che rese. Anise, che reroyañomi tēi catu peye mbahe che rembiapo rese —ehi—. ¹² Supi eté aipo ahe pëu: acoi ava che reroya vahe, ahe avei oyapora mbahe che rembiapo nungar, tuvicha catura rumo. Esepia, che asora che Ru piri —ehi—. ¹³ Acoi peporanduse que mbahe rese che rer pipe, che amondoño itera pëu. Ipipe che amboyecua che Ru reco pĩratasa. ¹⁴ Che ayapora que mbahe che rer pipe pe porandusa —ehi oreu.

Jesús, “Che amboura Espíritu Santo pëu” ehi viroyasar upe

¹⁵ “Che raisuse ité peye, pemboyeroia catu che porocuaita. ¹⁶ Che aporandura che Ru upe ombou vaheerã Espíritu supi eté vahe pe pĩtivii ãgua, ahe secoi vaheerã ité pe rese. ¹⁷ Ava Tüpa ndoicuai vahe rumo, ndoicatui chietera ipisi. Esepia, ndosepiai, ndoicuai avei yuvireco. Pe rumo peicua ité. Esepia, ahe ité secoi pe rese. Ipare oique itera pe pĩha pipe.

¹⁸ “Ndopoeyai chira pe güeraño tēi; ayevira niha pe rese aico vaheerã. ¹⁹ Chĩhi tēi oime vite ari che reroyasarēhi che repia vite vaheerã yuvireco. Ipare rumo ndache repia iri chira yuvireco. Pe rumo che repiaño itera peye iyavei peicoveño itera. Esepia, che aicoveño avei. ²⁰ Ahe ari pipe peicua che Ru rese che recosa, che rese pe recosa avei iyavei che aicose pe rese. ²¹ Acoi oicua vahe che

porocuaíta, omboyeroya vahe avei, ahe omboyecua ité che raisusa yuvireco. Che Ru osaisura che raisusar; che avei asaisura, ayemboyecua aveira chupe” ehi.

²² Judas (ndahei vahe rumo Iscariote) aipo ehi:

—Che Yar, ¿mahera oreuño ereyemboyecuara; mahera ru ndereyemboyecua iri chira ava nde reroyasarêhi upe? —ehi chupe.

²³ Evocoyase aipo ehi Judas upe:

—Acoi che raisu vahe, omboyeroya vahe che ñehe yuvireco, che Ru evocoyase osaisura iyavei che Ru reseve oroyura oroico vaheřã sese. ²⁴ Acoi ndache raisui vahe, ahe ndoviroyai avei che ñehe yuvireco. Co ñehesa pesendu vahe ndahei cheyesui tẽi; ahe rumo che Ru, che mbousar suindar —ehi.

²⁵ “Pe rese che reco vıtese, opa co mbahe amombehu vichico pẽu. ²⁶ Espıritu Santo rumo, Poropıtivıısar, che Ru ombou vahe che rer pıpe, ahe pe mbohera opacatu mbahe aviye vahe rese. Pe momahenduha aveira opacatu pẽu che ñehe agüer rese.

²⁷ “Aseya teco tuprisa pẽu, ahe che reco tuprisa; ndahei rumo avaño tẽi rembiapo nungar amondo pẽu. Anı, ‘¿Mara yahera pıha?’ peyera; anı chiaveira pesiquıye.

²⁸ Pesendupa niha acoi, ‘Asora, ipare ayevi irira pe rese aico vaheřã’ che hesa. Supi eté che raisuse peye, peviharetera peicuase che Ru pıri che sosa. Esepia, ahe ivate catu vahe ité che sui. ²⁹ Sese amombehupa voi co mbahe tenondeve pẽu, egiue ehise ité, ahese peroyara.

³⁰ “Namombehu pucu iri chira mbahe pẽu. Esepia, ou ité co ivı pıpe oporocuai tẽi vahe. Ahe rumo ndahei ivate catu vahe che sui ³¹ ‘toicua ava che reroyasarêhi che Ru raisusa yuvireco’ che hesa pıpe. Ayapoño ité che Ru che cuaita.

“Pepıha. Yaso cohava sui” ehi güemimbohe eta upe.

15

Jesús uva hi nungar

¹ Ipape Jesús oñehe iri oreu aipo ehi: “Che aico inungar uva hi supi eté vahe; che Ru evocoyase inungar sese ihañeco vahe secoi. ² Ahe oyasia sāca ndihai vahe ichui yepi; iha vahe rumo omoatiro tupri iha catu āgua. ³ Pe pe recocuer imoatiropri ité che pe mbohesa pipe. ⁴ Peicoño ité catu che rese inungar che aicoño ité avei pe rese. Uva rāca oise ohi sui, ndiha iri ahe ae tēi; pe avei ěgüe peyera peyepipse che sui” ehi oreu.

⁵ “Che niha uva hi nungar aico; pe evocoyase sāca nungar peico. Acoi secoi vahe che rese, che avei aico sese. Inungar mbahe miti iha ati vahe, ěgüe ehira ahe. Supi eté ndapeicatu chietera che porēhi mbahe apo. ⁶ Acoi ndasecoi vahe che rese, ahe imombosara inungar acoi uva rāca yipi vahe. Ipape imonuhasa sapi āgua” ehi oreu.

⁷ “Pe peicoñose ité che rese ndaperesaraise avei che porombohesa sui, peporanduño mbahe pe remimbotar rese, ahese imondosara pēu” ehi. ⁸ “Che Ru oipisira omboeteisa pe sui acoi peyapo tuprise opacatu che remimbotar. Pemboyecua evocoyase che remimbohe supi tupri vahe pe recosa. ⁹ Che opoaisu ité, inungar che Ru che raisu. Sese peicoño ité catu che poroaisusa pipe. ¹⁰ Esepia, pemboyeroyase che porocuaita, peicoveño itera co che poroaisusa pipe. Inungar che che Ru amboyeroya che cuaisa iyavei aicoveño ité che Ru poroaisusa pipe vichico.

¹¹ “Che aipo ahe pēu ‘tovireco che vihasa oyese yuvireco’ viya; ‘toyemboviharete catu yuvireco’ che hesa pipe. ¹² Co che porocuaita: Peyeaisu ñepepei, inungar che opoaisu. ¹³ Ndipoi eté que poroaisusa ivate catu vahe co sui omondose que ava güecocuer omboripar rese nara. ¹⁴ Pe che mboyeroyase peye, ahese che mboripar peico. ¹⁵ ‘Pe mbiguai peico’ ndahe iri pēu. Esepia, mbiguai

ndoicuai eté mbahe güerecuar pïhañemoñetasa. Sese, ‘Che mboripar’ ahe pëu. Esepia, aicua ucapa ñehesa che Ru cheu omombehu vahe pëu. ¹⁶ Pe niha ndache poravoi peye. Che rumo opoporavo iyavei opocuai peporaviquí vaheã ava reru ãgua cheu ‘che rese ité toyuvirecoi’ che yapave. Evocoyase che Ru omboura mbahe pe porandusa che rer pipe pëu. ¹⁷ Co rese opocuai: Peyeaisu catu ñepeipei peyacatu” ehi Jesús güemimbohe upe.

Jesús amotarëhimbar, supindar amotarëhimbar avei

¹⁸ “Acoi ava ndoicuai vahe Tüpa pe amotarëhise, pe-
 icuaño che rane che amotarëhi yuvireco yipindar. ¹⁹ Pe
 peico vïtese ava Tüpa ndoicuai vahe pãhuve, evocoyase
 pe raisu aira yuvireco viña. Che rumo opoporavo ipãhu
 sui yuvireco. Sese tã ndape ambota iri yuvireco. Esepia,
 pe ndahe iri ipãhu pendar peico. ²⁰ Peyemomahenduha
 pëu aipo che hesa rese: ‘Ndipoi eté que mbiguai ivate
 catu vahe güerecuar sui’ ahe. Che niha yipindar yamo-
 tarëhimbrï aico, pe avei pe amotarëhira yuvireco. Acoi
 omboyeroya vahe rumo che porombohesa, pe porombo-
 hesa avei omboyerozara yuvireco. ²¹ Co opacatu mbahe
 che recocuer sui tã ãgüe ehira pëu. Esepia, ndoicuai niha
 che mbousar yuvireco.

²²⁻²⁴ “Che ndayuisse ahe ava upe mbahe sembiavi
 mombehu viña, evocoyase, ‘Peyavi mbahe’ ndehi chira
 Tüpa chupe yuvireco viña. Che rumo ayu ité, amombehu
 mbahe sembiavi yuvireco chupe, ayapo avei mbahe ava
 ndoyapoi vahe yuvireco ipãhuve; ahe rumo yepe osepia
 co mbahe yuvireco viña, che amotarëhiño, che Ru avei
 oyamotarëhi yuvireco. Sese, ‘Pereco ité mbahe pe rem-
 biavi peyese’ ehi Tüpa chupe. Esepia, acoi che amotarëhi
 vahe, che Ru avei oyamotarëhi yuvireco. ²⁵ Co rumo
 ãgüe ehi. Esepia, imboaviyesa rane itera ñehesa sesendar

icuachiapri pipe aipo ehi vahe: ‘Mbahe apoēhi pipe sui tēi che amotarēhi yuvireco’ ehi vahe.

²⁶ “Acoi ambouse rumo Poropĩtĩviisar, Espĩritu supi eté vahe che Ru sui pēu, ahe omombehura che recocuer. ²⁷ Pe avei pemombehura che recocuer. Esepia, yipĩsuive ité peico che rupi” ehi.

16

¹⁻² “Pe mocañiehi āgua che rese pe yeroyasa aipo ahe opacatu co mbahe imombehu pēu: pe mombora judío rerecuar oñemonuhasa sui yuvireco, pe yuca aveira yuvireco. Ahe rumo omohara, “Tũpa uve nara revo na yahe’ ehira yuvireco viña. ³ Evocoi rumo ēgũe ehira yuvireco che Ru cuaēhi pipe iyavei che cuaēhi pipe yuvireco. ⁴ Amombehu aipo pēu acoi ēgũe ehise, peyemomahenduhara che remimombehugũer rese.

Espĩritu Santo rembiapo

“Yipĩsuive rumo namombehui co mbahe pēu. Esepia, aicoveño ité pe rese. ⁵ Cũritei rumo asora che mbousar piri iyavei ndipoi que ñepei pe pāhu pendar ‘¿que vo aipo eresora?’ ehi vahe cũritei cheu. ⁶ Pe rumo ndapeyembovihaiño aipo mbahe amombehuse pēu. ⁷ Supi eté rumo aipo ahe pēu: aviye catura pēu che asose. Esepia, ndasoise viña, ndoui chietera pe rese Poropĩtĩviisar. Asose rumo, che amboura pēu. ⁸ Ouse ahe, oicua ucara ava che cuaēhisar upe yangaipa, oicua uca aveira tecocuer ĩvisa iyavei cañisa ndaseco pōrai vahe upendar. ⁹ Oicua ucara yangaipa chupe ndache reroyaise yuvireco; ¹⁰ oicuara rumo che reco ihĩvi tupri vahe yuvireco. Esepia, asora che Ru recosave, ahese pe ndache repia iri chietera peye; ¹¹ iyavei oicuara Tũpa poromocañisa. Esepia niha, Carugar, ahe co ivi pipendar rerecuar oipĩsira che Ru Tũpa ñemoirosa.

¹² “Setá iteanga mbahe oime amombehu vaheṛã p̃eu. Pe rumo ndapeicatui chira cūrītei senducua. ¹³ Ouse rumo Espiritu supi eté vahe, ahe pe mbohera mbahe supi eté vahe rese. Esepia, noñehi chira oyesui t̃ei, ahe rumo omombehura mbahe osendu vahe güeraño, oicua uca aveira mbahe coiye oime vaheṛã. ¹⁴ Ahe che mboeteira. Esepia, oicua ucara opacatu mbahe cheundar p̃eu. ¹⁵ Opacatu mbahe che Ru vireco vahe, che mbahe. Sese niha, ‘Espiritu oipisira opacatu mbahe cheundar, oicua uca aveira p̃eu’ ahe.

¹⁶ “Aviyeteramo t̃ei ndache repia iri chira peye. Ipare rumo coiye catumi che repia irira peye” ehi oreu.

Yepe semimbohe ndovihai chira viña, coiye catu rumo oviharetera yuvireco

¹⁷ Evocoyase ore oroporandu-randu t̃ei oreyeupe aipo orohe:

—¿Mara oya p̃iha: ‘Aviyeteramo t̃ei ndache repia iri chira peye’ ehi yandeu; ipare rumo aipo coiye catumi yasepiara iyavei aipo osora Vu p̃iri no? ¹⁸ ¿Mara oya vo aipo: ‘Aviyeteramo t̃ei’ ehi? Ndayasenducuai mo aipo iñehesa —orohe oreyeupe.

¹⁹ Ipare rumo ‘oporandura co mbahe rese yuvireco cheu’ oya aipo ehi voi oreu:

—¿‘Ipare rumo coiye catumi che repia irira peye’ che he agüer rese co pe porandu vite peyeupe? —ehi—.

²⁰ Supi eté aipo ahe p̃eu: peyasehora pe vihar̃ehisa pipe, ava angaipa viyar rumo ovihareteñora yuvireco. Yepe pe, ndapevihai chira viña, coiye catu rumo peviharetera.

²¹ Inungar acoi que cuña imembira potase, tasi chupe oyepotase ari imembira ãgua; p̃itani oha pare rumo, nimahenduha iri tasicuer rese; soriveteño omembri rese.

²² Ëgüe peye avei; pe cūrītei tasi avei p̃eu, ayevi irira rumo

pe repia ãgua, ahese peviharetera. Ahe viharetesa ndipoi chietera que ava virocua vaherã pe sui.

²³ “Ahe ari pipe, ndapeporandu iri chietera mbahe rese cheu. Supi eté aipo ahe pëu: che Ru omboura opacatu mbahe pëu che rer pipe peporanduse. ²⁴ Cûritei rumo ndapeporandu vitei mbahe rese che rer pipe. Peporandu catu sese, ahese peipisira. Ipípe sui perorivete catura.

Jesucristo mbahe-mbahe tēi recopisar

²⁵ “Opacatu mbahe rese niha amboyoya tecocuer pëu. Oimera rumo ari namboyoya iri chira ambuae mbahe rese tecocuer; ipa voi amombehu itera mbahe pëu che Ru recocuer resendar. ²⁶ Ahe ari pipe pe peporandura mbahe rese che rer pipe; che rumo, ‘Ayerquirã pe rese che Ru upe’ ndahei pëu. ²⁷ Esepia, che Ru ae ité pe raisu. Pe raisu ité niha. Esepia, pe che raisu peye, che reroya avei che Ru Tûpa sui che yuse peye. ²⁸ Asê che Ru sui co ivi pipe vitu; cûritei rumo aseyara co ivi, ajevira che Ru upe” ehi oreu.

²⁹ Evocoyase ore aipo orohe chupe:

—Indó, aipo rupi ereñehe tupri catu ité; nderemboyoya iri ambuae mbahe rese imombehu oreu. ³⁰ Supi eté ereicua opacatu mbahe, ereicua avei ore porandusa. Evocoyase ndiya iri ore porandu ãgua mbahe rese ndeu. Sese oroviroya Tûpa sui nde yusa —orohe chupe.

³¹ —¿Evocoyase che reroya ité peye? —ehi—. ³² Supi eté oyepota ari cute, co pipe ité peyemosaipara che sui; che reyara che aemi peye. Ndahei rumo che ae aico. Esepia, che Ru secoi che rese. ³³ Amombehu co opacatu pëu che rese mbahe tupri pipe pe reco ãgua. Peparaisu itera co ivi pipe; peyemonguerêhi catura rumo. Esepia, che opa ité asecopi co ivi pipendar mbahe tēi —ehi.

17

Jesús oyeróqui güemimbohe rese

¹ Aipo ohe pare, Jesús omahe iva rese aipo ehi: “Che Ru, oyepota ari cute. Che mboetei eve, ipipe sui avei che nde Rahir toromboetei. ² Supi eté niha, nde erembou che mborerecua ãgua opacatu ava ivi pipendar harive iyavei tecovesa apirêhi mondo ãgua opacatu ava nde cheu erembou vahe upe. ³ Co niha tecovesa apirêhi, tande cua nde Tüpa ñepei supi eté vahe nde recose yuvireco, tache cua avei nde che mbose yuvireco.

⁴ “Che niha oromboetei co ivi pipe, iyavei ayapo nde che cuaisa. ⁵ Sese che Ru, embou irimi cūritei che reco porañete ãgua, inungar acoi yipindar areco vahe nde rese ivi apoêhiseve.

⁶ “Co nde rembiporavo ava co ivi pipendar pãhu sui erembou vahe cheu; orocua ucapa chupe. Yipindar ndeundar yuvirecoi. Ipare nde erembou cheu. Ahe viroya ité nde ñehe yuvireco. ⁷ Cūritei oicuapa opacatu mbahe nde suindar cheu erembou vahe yuvireco. ⁸ Esepia, amombehu ité nde ñehe erembou vahe cheu; ahe viroya ité yuvireco, viroya avei nde che mbousa yuvireco.

⁹ “Che ayeroqui cheu nde remimbou rese ndeu. Esepia, ndeundar ité yuvirecoi; ndayeroqui rumo ambuae ava che reroyasarêhi rese. ¹⁰ Opacatu ava cheundar, ndeundar avei; ndeundar evocoyase cheundar. Ahe sese che reco porañetesa oyecua.

¹¹ “Che ndapitai chira co ivi pipe; ahe rumo opitara cohove yuvireco. Che evocoyase asora nde piri. Che Ru, seco maranehi vahe, esãro nde pĩratasa pipe nde remimbou cheu oyese yuvirecoi tupri ãgua inungar yande yaico. ¹² Aicose co ivi pipe, asãro tupri nde rer pĩratasa cheu erembou vahe pipe; chemahemoha yuvireco sese mbahe tẽi sui. Ndipoĩ eté que ñepei ocañi tẽi vahe; acoi

yipive ocañi vaheño ité rumo ocañi tēi; nde ñehe rupi tupri ité ěgüe ehi.

¹³ “Cūrítei asora nde recosave. Co ivi pipe che reco viteso rumo, amombehu co mbahe chupe ‘tovireco che viharetosa yuvireco’ che yapave. ¹⁴ Che niha amombehu nde ñehe yuvireco chupe. Ava che reroyasarēhi rumo oyamotarēhiño yuvireco. Esepia niha, ndahe iri Caruguar povri pendar yuvirecoi inungar che ndahei ipovri pendar aico. ¹⁵ ‘Enose ava Caruguar povri pendar pāhu sui’ ndahei ndeu, che rumo aipota eresepira Caruguar sui. ¹⁶ Inungar che ndahei Caruguar povri pendar aico, ěgüe ehi avei ahe yuvireco. ¹⁷ Eipeha tupri angaipa sui ndeyeupe nara yuvireco ñehesa supi eté vahe reroyase. Nde ñehesa niha supi tupri vahe ité. ¹⁸ Inungar nde che mbou eve ava co ivi pipendar pāhuve, ěgüe ahe avei che imondo ava pāhuve yuvireco. ¹⁹ Amondo ité che recocuer ndeu nara ‘toyemondo catu yuvireco chupe co ñehesa supi tupri vahe reroya pipe’ viya.

²⁰ “Ndayeroquii co che remimbohe reseño ndeu, ayeroqui avei rumo ambuae ava che reroyasar ñehesa sui che reroya vaheñā rese. ²¹ Aporandu avei ndeu toyuvirecoi tupri ité yuvireco oyese inungar ñepei vahe, ěgüe tehi avei yuvireco yande rese, che Ru, inungar nde ereico che rese, che avei aico nde rese. Toyuvirecoi tupri ité catu yuvireco oyese. Ipipe sui ava co ivi pipendar toviroya nde che mbousa yuvireco. ²² Che reco porañetosa nde erembou vahe cheu, ahe tupri avei amondo yuvireco chupe ñepei vahe nungar yuvirecoi āgua, inungar yande ñepei vahe yaico. ²³ Che aico yuvireco sese, nde evocoyase ereico che rese ahe yuvirecoi tupri āgua inungar ñepei vahe. Ipipe sui ava co ivi pipendar toicua nde che mbousar ereico iyavei eresaisu che remimbohe yuvireco inungar nde che raisu eve.

²⁴ “Che Ru, nde niha erembou co che remimbohe cheu. Aipota rumo ahe yuvirecoi che piri che recosave osepia vaheerã teco porañetesa cheu erembou vahe yuvireco. Nde niha yipive ité che raisu eve ivi apoẽhiseve. ²⁵ Che Ru, seco catupri vahe, ava co ivi pipendar tẽi nande cuai yuvireco; che rumo orocua ité, co avei oicua nde che mbousa yuvireco. ²⁶ Orocua uca chupe, orocua ucaño vite itera rumo. Evocoyase nde che raisusa tovireco avei yuvireco, che avei taico yuvireco sese” ehi Jesús oyeroqui güemimbohe recocuer rese.

18

Jesús oipisi yuvireco

¹ Aipo ohe pare, Jesús ore renose ore reraso iembí Cedrón rovai. Aheve oime mbahe miti rëta, ipipe Jesús ore reroique ore reraso. ² Iyavei Judas omondo vaheerã yamotarẽhimbar upe oicua avei aheve secosa. Esepia, setá rupi Jesús rese oroñemonuha aheve yepi. ³ Sese Judas oyepotaño ité aheve sundao rehii reseve iyavei sundao tũparo rãrosar pahí rerecuar iyavei fariseo eta remimondo opacatu oyoepisa reseve yuvirecoi, guataendi reseve-seve avei yuviraso. ⁴ Yipive ité rumo oicua oyeupe mbahe oime vaheerã. Sese osẽ voi eté yuvireco chupe oporandu:

—¿Ava vo peseca? —ehi.

⁵ Ahe ava rehii omboyevi yuvireco chupe:

—Jesús, Nazaret pendar, oroseca —ehi.

—Che niha ahe aico —ehi ava rehii upe.

Judas ipãhuve secoi imondo água yamotarẽhimbar upe.

⁶ “Che niha ahe aico” ehise ava upe; guaquicuei coti pãve opa oviapi yuvireco. ⁷ Evocoyase oporandu iri ava upe:

—¿Ava vo peseca? —ehi.

Ahe aipo ehi yuvireco:

—Jesús, Nazaret pendar —ehi.

⁸ Aipo ihese,

—“Che niha ahe aico” ahe pëu —ehi—. Che che recase peye, pepocoi rene catu co ambuae rese, toyuvirasopaño —ehi.

⁹ Co rumo iñehe mboaviye ãgua ëgüe ehi: “Acoi che Ru ombou vahe cheu, nocañi eté que ñepei che sui” ehi. ¹⁰ Evocoyase Simón Pedro vireco vahe quise, vinose, oyasia Malco serer vahe nambi yasu cotindar, ahe pahi rerecuar ivate catu vahe rembiguai. ¹¹ Pedro upe rumo aipo ehi:

—Emondo iri quise siru pipe —ehi—. Che Ru niha co mbahe yavai vahe ombou cheu. Añemosañño itera chupe —ehi.

Jesús serasosa mborerecuar Anás rovai

¹² Evocoyase sundao rerecuar, osundao eta reseve iyavei judío tūparo rãrosar oipisi Jesús yuvireco, oipocua. ¹³ Yipindar viraso Anás rētave yuvireco. Esepia, ahe Caifás rovayar. Ahe araviter pipe aipo Caifás pahi eta rerecuar ivate catu vahe secoi. ¹⁴ Caifás ité aipo ehi omboetasa upe: “Yandeu aviye catu itera que ñepei mbia omanose yande rese” ehi.

Pedro, “Ndaicuai co mbia” ehi Jesús upe

¹⁵ Ore Pedro rese orosoño ité Jesús raquicuei. Che rumo pahi eta rerecuar rēta pipendar opa ité che cua yuvireco. Sese aiqueño ité Jesús raquicuei mborerecuar rētave vicho. ¹⁶ Pedro rumo opitaño oquendipive ocarve. Che rumo pahi eta rerecuar che cua ité yuvireco. Evocoyase asë, aporandu oquendipi rãrosar uve Pedro reique ãgua rese. ¹⁷ Evocoyase oquendipi rãrosar oporandu Pedro upe:

—¿Ndahei vo nde avei co ava rupindar? —ehi chupe.

—Aní, ndahei che ahe —ehi oquendipi rãrosar upe.

¹⁸ Sōhisá iteanga ahe pĩtu pĩpe. Evocoyase mborecuar rembiguai iyavei sundao eta oyatapi yuvireco oyepehe ãgua. Pedro avei aheve ipãhuve oyepehe tata ipive ohã.

Pahi eta rerecuar ivate catu vahe oporandu Jesús upe secocuer rese

¹⁹ Pahi eta rerecuar ivate catu vahe, “¿Uma-uma vo nde remimbohe yuvirecoi iyavei mbahe rese vo erembohe?” ehi oporandu Jesús upe. ²⁰ Jesús rumo aipo ehi chupe:

—Che niha ãñehe opacatu rupi, opacatu ava eta rovaque avei. Esepia, aporomboheño ité niha ava ñemonuhasa rupi, tũparo guasu pĩpe avei. Indó, che ñañemi eté ãñehe vaherã. ²¹ ¿Mahera vo evocoyase cheu tẽi ereporandu? Eporandu catu che ñehe rendusar upe. Ahe tomombehu che oyeupe ñehesa yuvireco ndeu. Ahe niha oicua che ñehe agüer yuvireco —ehi.

²² Aipo ihese, ñepei mbia sundao osovapete aipo ehi chupe:

—¿Aipo ere rutei pahi rerecuar ivate catu vahe upe imboyevi? —ehi chupe.

²³ Evocoyase omboyevi ahe mbia upe:

—Ñehese mbahe tẽi rese, emombehu che ñehe raisa; che rumo ãñehe tupri ité, ¿mahera vo evocoyase che rovapete eve? —ehi.

²⁴ Evocoyase Anás omondo pahi eta rerecuar ivate catu vahe Caifás upe ipocuasa reseve.

Pedro, “Ndaicuai co mbia” ehi vite Jesús upe

²⁵ Ahese Pedro oyepeheño vite ohã tata ipive. Aheve aipo ehi yuvireco chupe:

—¿Ndahei vo nde ité evocoi ava rupindar ereico? —ehi.

Pedro rumo,

—Aní, ndahei che ahe aico —ehiño.

²⁶ Ipare mbia pahi rerecuar ivate catu vahe rembiguai, inambi asiapri mu aipo ehi chupe:

—¡Aviye acoi nde ité oroepia vahe mbahe miti rēta pipe supi! —ehi chupe.

²⁷ Pedro rumo, “Aní, ndahei eté che” ehi iriño. Aipo iheseve, tacura oñehe.

Jesús serasosa Pilato rovai

²⁸ Evocoyase viraso Jesús Caifás rēta sui Roma pendar mborerecuar guasu recosave yuvireco. Cōhe potase ěgüe ehi. Judío rumo ndoyuviroiquei eté mborerecuar recosave oyemboangaipaēhi āgua. Esepia, ahe icuaita yuviroiquese, ndiyai chietera Pascua resendar ovesa roho hu āgua yuvireco chupe viña. ²⁹ Sese Pilato osē ava upe aipo ehi:

—¿Mbahe vo sembiapo naporai vahe? —ehi.

³⁰ Ahe omboyeví yuvireco chupe:

—Seco catuprise, ndorogüerui chietera ndeu viña —ehi yuvireco chupe.

³¹ Evocoyase aipo ehi ava upe:

—Peraso, pe ae peyapo mbahe pēundar ité porocuaita rupi sese —ehi.

Judío rerecuar evocoyase omboyeví yuvireco:

—Ore judío oroico vahe upe rumo ndipotasai oroyuca vajerã que ava —ehi.

³² Ěgüe ehi Jesús ñehe imano āgua resendar yaviye.

³³ Ahese Pilato oi que iri oí pipe, güeru uca Jesús oyeupe oporandu chupe:

—¿Nde ité vo judío rerecuar ivate catu vahe ereico? —ehi.

³⁴ —¿Ndeyesui eté aipo ereporandu cheu, anise, oime tie que ambuae ava che mombehu vahe ndeu? —ehi Pilato upe.

³⁵ —¡Che ndahei eté judío aico! Nde recua pendar ae niha pahi eta rerecuar nde reru yuvireco cheu. ¿Mbahe vo evocoyase ereyapo? —ehi Pilato chupe.

³⁶ —Che mborerecuasa rumo ndahei co ivi pīpendar. Co ivi pīpendarse viña, che rupindareta ovavara che amotarēhimbar upe che repisave yuvireco viña. Che mborerecuasa rumo ndahei eté coha pendar —ehi.

³⁷ Ahese Pilato aipo ehi chupe:

—Evocoyase nde mborerecuar guasu ité ereico —ehi.

—Nde niha aipo, “Mborerecuar guasu ereico” ere cheu. Aherã niha che aha co ivi pipe mbahe supi eté vahe mombehu ãgua. Opatatu ava viroya vahe mbahe supi eté vahe, osenduño ité che ñehesa yuvireco —ehi Pilato upe.

³⁸ Pilato rumo,

—¿Mbahe vo aipo supi eté vahe? —ehi chupe.

“¡*Tayaticasa!*” ehi ava eta Jesús uve yuvireco

Aipo ohe pare, Pilato osē iri judío eta upe oñehe aipo ehi:

—Che ndayosui eté co mbia rese mbahe sembiavi. ³⁹ Pe rumo peicua amose ñepeí ava soquendapri Pascua pieta pipe yepi; ¿peipota amose vaheñã judío rerecuar? —ehi.

⁴⁰ Aipo ihese, opatatu osapucaí pĩratá yuvireco aipo ehi:

—¡Evocoi aní! ¡Barrabás catu emose! —ehiño yuvireco. Barrabás rumo imonda rai vahe secoi.

19

¹ Evocoyase Pilato oporocuai Jesús nupa ãgua. ² Sundao eta omonde ñaca rese yu pīapri iyavei omboyemonde turucuar pĩraumbi vahe pipe yuvireco. ³ Ipare oyemboya sese aipo ehi:

—¡Imboetepri judío Rerecuar tasecoi! —ehi angahu sovapete-pete yuvireco.

⁴ Pilato evocoyase osẽ iri ava upe aipo ehi:

—Pesepia, anose pẽu pe icua ãgua che ndayosui eté mbahe sembiavi —ehi.

⁵ Evocoyase vinose yu piapri oãca rese turucuar pĩraumbi vahe reseve senoha ava upe. Ahesa Pilato aipo ehi:

—¡Ndo co aipo mbia cute! —ehi.

⁶ Osepiase pahi eta rerecuar, sundao rerecuar avei, omboipĩ osapucaí:

—¡Tayaticasa! ¡Tayaticasa! —ehi pãve voi yuvireco chupe.

Pilato evocoyase aipo ehi ava upe:

—Peraso, peyatica pe ae. Esepia, che ndayosui eté mbahe sembiavi —ehi.

⁷ Judío rerecuar rumo omboyeví yuvireco:

—Ore rumo orovireco mborocuaíta. Ipípe omanoño itera. Esepia, oyeapo tẽi Tũpa Rahir —ehi yuvireco.

⁸ Aipo ñehesa renduse, Pilato oyembosiquiyé catu.

⁹ Viroique iri oi pipe seraso. Aheve oporandu chupe:

—¿Que pendar ité vo nde ereico? —ehi.

Ahe rumo nomboyeví iri eté ñehe chupe. ¹⁰ Evocoyase Pilato aipo ehi chupe:

—¡Mahera ndereñehei eté cheu! ¿Ndereicuái vo che mborerecuar aico nde atica uca ãgua, mbahe tẽi sui nde renose ãgua avei? —ehi Pilato chupe.

¹¹ —¡Aní! Ndererecoi chietera nde mborerecuasa che harive Tũpa nombouise ndeu viña. Sese niha ava che mondosar ndeu oyemboangaipa catu nde sui yuvireco —ehi Pilato upe.

¹² Ahe ramoseve, Pilato osãha iri tẽi Jesús renose ãgua; judío rerecuar rumo osapucaí voiño yuvireco chupe:

—¡Acoi eremosese co mbia, ndahei chietera nde mborerecuar ivate catu vahe mboripar ereico! ¡Opacatu oye-momborerecua tēi vahe, ahe evocoiyase mborerecuar ivate catu vahe amotarēhimbar tēi yuvirecoi! —ehiño yuvireco chupe.

¹³ Evocoiyase Pilato osenduse aipo ihesa, vinose uca Jesús ocarve, oguapí mborerecuar guasu renda harive. Ahe mbahe rese porandusa rer hebreo ñehe pìpe Gabata ‘ita apopri’ oya. ¹⁴ Mbit̄er ari Pascua pieta ãgua Pilato aipo ehi judío eta upe:

—¡Ndo co pe rerecuar cute! —ehi.

¹⁵ Ahe rumo osapucai p̄iratá aipo ehi yuvireco:

—¡Tomano! ¡Tomano ité! ¡Tayaticasa! —ehi yuvireco chupe.

Pilato rumo aipo ehi chupe:

—¿Evocoiyase ayatica ucara pe rerecuar? —ehi.

Pahi eta rerecuar rumo omboyeveí yuvireco chupe:

—¡Ore ndorovireco iri ambuae mborerecuar, Roma pendar mborerecuar ivate catu vahe güeraño ité orovireco! —ehi yuvireco.

¹⁶ Ipare Pilato omondo sundao upe yatica uca ãgua. Ichui víraso yuvireco.

Jesús yaticasa curusu rese

¹⁷ Evocoiyase Jesús vinose curusu seraso “Ava Ñcagüer” serer vahesave (ahe serer hebreo ñehe pìpe Gólgota).

¹⁸ Aheve oyatica yuvireco. Seseve avei oyatica ñuvirío ava yuvireco, ñepeí-peí yique ivii. ¹⁹ Pilato oicuachía uca omondo curusu rese aipo ehi vahe: “Co Jesús, Nazaret pendar, judío Rerecuar guasu” ehi. ²⁰ Setá iteanga ava oyeroquí co icuachiapri rese yuvireco. Esepia, icuachiasa hebreo, latín iyavei griego ñehe pìpe. Iyavei yaticasa

namombriimi eté tecua sui. ²¹ Sese pahi eta rerecuar aipo ehi Pilato upe yuvireco:

—Aní, ‘Judío Rerecuar guasu’ ere icuachía; iyacatu rumo, ‘Oyeapo pota tēi vahe judío Rerecuar guasu’ erera icuachía imoi —ehi yuvireco chupe.

²² Pilato rumo omboyevi:

—Co aicuachía vahe, ěgüe ehiño itera oĩ —ehi.

²³ Jesús atica pare evocoi irungatu sundao, omonuha iturucuar oyeupe imboyaho āgua yuvireco. Oipisi avei iturucuar ivri pendar nimbovívísai vahe, ñepei reseve pucuño tēi vahe. ²⁴ Sundao eta aipo ehi oyeupe yuvireco:

—Yamondoro eme; aviye catu yandeguayíño sese, ¿ava ité pīha oipísira? —ehi yuvireco.

Ěgüe ehi icuachiapírer imboaviye yuvireco aipo ehi vahe: “Omboyaho-yaho ava che turucuar iyavei iguayí yuvireco sese” ehi vahe. Supi tupri ité ěgüe ehi sundao yuvireco.

²⁵ Curusu ivípive yuvirecoi ichi, ichi cupíhir, María Cleofas rembireco, María Magdalena avei. ²⁶ Osepiase osi iyavei che repiase yípive, che güembiaísu, aipo ehi osi upe:

—Che si, evocoi nde membírã ererecora —ehi chupe.

²⁷ Ipare voi aipo ehi cheu:

—Evocoi nde si —ehi.

Ichuive tupri amoingue ichi che rētave asãro vaherã.

Jesús mano agüer

²⁸ Ipare Jesús oicua ité Vu remimbotar yaviyepa iyavei icuachiapírer mboaviye āgua aipo ehi:

—Che husei —ehi.

²⁹ Aheve oime mbahe riru. Ipipe savapípo vinagre oĩ. Co vinagre pipe omoaqui mbahe saviyu vahe yuvireco omondo ivíra rese, osupi, imondo iyuruve yuvireco.

³⁰ Osupite pare aipo ehi:

—Opa yaviye cute —ehi.

Ipare voi ñiaca iviso omano.

Sundao oñaruca cutu lanza pipe Jesús

³¹ Ñepei ari Pascua pieta uve ipane vahe pipe aipo ãgüe ehi. Sese judío ndoipotai ava retecuer pita curusu rese mbituhusa ari pipe. Esepia, ahe mbituhusa ari imboeteipri guasu ité. Sese Pilato upe oporandu yuvireco ahe oyocuai vaheã sundao curusu rese yaticapri rētima mope ãgua ‘tomanó’ oyapave curusu sui setecuer reroyipa ãgua yuvireco. ³² Evocoyase sundao yuvirasopa ñuvirío mbia Jesús rese yaticasa vahe yuvireco. Ahe sētima rane opa omope yuvireco. ³³ Oyemboyase rumo Jesús rese, “Omano ité” ehiño yuvireco chupe. Sese nomopei sētima yuvireco.

³⁴ Ñepei sundao rumo oicutu yiqueve lanza pipe. Ahe ramoseve voi osē suvi, i reseve. ³⁵ Che asepia vahe ité; supi eté aipo ahe. Evocoyase amombehu pēu pe seroya ãgua. ³⁶ Esepia, co mbahe ãgüe ehi icuachiapirer mboaviye ãgua aipo ehi vahe: “Ndimopesai chietera que ñepei icangüer” ehi vahe aracahe. ³⁷ Iyavei ambuae icuachiapri aipo ehi: “Osepiara ava eta icutupri yuvireco” ehi.

Jesús yapocatusa ita hopri pipe

³⁸ Ipare José, tecua Arimatea pendar, oporandu Pilato upe Jesús rehögüer reraso ãgua rese. José aipo Jesús rupindar. Ndoyecua ucai rumo omboetasa judío eta upe pahí rerecuar sui osiquiyepave. Pilato evocoyase, “Aviye, eraso” ehi chupe. Evocoyase José oso víraso sehögüer. ³⁹ Nicodemo avei oipitívii, acoi oso vahe Jesús upe pītuse. Ahe güeru mbahe siácia vahe mirra, áloe rese oyeseha vahe, treinta kilo, sehögüer rese nara. ⁴⁰ ãgüe ehi José, Nicodemo reseve víraso sehögüer yuvireco iyavei oimama tupri turucuar secose vahe imoiacuapri pipe yuvireco. ãgüe ehi judío oyapo ava omano vahe tĩ ãgua

yuvireco yepi. ⁴¹ Namombrii Jesús aticasa sui oime mbia remiti rēta. Aheve ité oime tuvipa ita hopri, ipiasu vahe iporupirēhi. ⁴² Ipipe omoingue Jesús rehögüer yuvireco. Esepia, ahe tuvipa cōimi eté ichui iyavei virovi ité judfo pituhusa ari.

20

Jesús cuerayevisa

¹ Domingu pipe María Magdalena oso tuvipave p̄itu vitemiseve. Ahe osepia ita tuvipa rovapisa ndahe irise güendave ihāi. ² Evocoyase ahe cuña oña oso Simón Pedro upe, cheu avei aipo ehi:

—¡Viraso tuvipa sui yande Yar yuvireco! ¡Ndoroiuai que vo catu omondo yuvireco! —ehi.

³ Evocoyase Pedro rese oroña oroso tuvipave. ⁴ Che rumo aña catu Pedro sui. Che rane evocoyase ayepota tuvipave. ⁵ Aiviro tēi, turucuar güeraño rumo asepia aheve. Ndaiquei rumo ipipe. ⁶ Ipare Pedro oyepota che raquicuei, oique voi tuvipa pipe. Ahe avei osepia turucuar imama agüer tēi. ⁷ Iyavei osepia turucuar ñaca mamasa. Ndahei eté setecuer mamasa rese tui; ahe rumo co coti ité ipoquesa tupri ou. ⁸ Evocoyase che avei aique; asepia ēgüe ehi vahe. Ahese aroya voi eté. ⁹ Ore rumo ndorosenducua vitei eté icuachiapri: “Ocueraevira omano vahe p̄ahu sui” ehi vahe. ¹⁰ Ipare oroyevipa oroso ore rētave.

Jesús oyemboyecua María Magdalena upe

¹¹ María rumo, ore raquicuei ou vahe, opitaño ité tuvipa ipive, oyaseho. Oyasehoseve oiviro iri tuvipa pipe, ¹² ahese osepia ñuvirío Tūpa rembiguai iturucuar morochí vahe oguapi yuvinoi sehögüer rupagüerve. Ñepepi oguapi oĩ ñaca rupagüer coti, ambuae ipi rupagüer coti. ¹³ Ahe Tūpa rembiguai oporandu yuvireco chupe:

—Cuña, ¿mahera vo ereyaseho? —ehi.

Ahe aipo ehi:

—Esepia, che Yar rehögüer viraso yuvireco iyavei ndaicuai que vo catu omondo yuvireco —ehi.

¹⁴ Aipo oheseve, oyemboyere, osepia Jesús aheve sec-oise; “Jesús co secoi” ndehi eté rumo chupe. ¹⁵ Evocoyase oporandu María upe:

—Cuña, ¿mahera vo ereyaseho? ¿Ava vo eresecca? —ehi chupe.

Ahe omoha ‘co mbahe miti rēta rārosar revo’ oya viña, aipo ehi chupe:

—Nde ererasose sehögüer, emombehuñomi tēi cheu que vo eremondo. Aheve taso seca —ehi chupe.

¹⁶ Evocoyase,

—¡María! —ehi chupe.

Ahe aipo hese, oyemboyere, aipo ehi hebreo ñehe pipe chupe:

—¡Rabuni! —ehi (‘Porombohesar’ ohesave).

¹⁷ Evocoyase María upe,

—Erepcoci rene che rese. Esepia, ndayeupi vitei che Ru recosave. Esoño, emombehu che reroyasar upe: “Jesús oyeupira Vu Tūpa recosave” erera chupe. Che Ru, pe Ru avei; che Tūpa, pe Tūpa avei —ehi.

¹⁸ Evocoyase María Magdalena ou imombehu: “Asepia yande Yar” ehi iyavei opa omombehu mbahe semi-mombehu oreu.

Jesús oyemboyecua güemimbohe upe

¹⁹ Ahe ari pipeve, domingu pipe, pñtuse, ore ore ñe-monuhasave oroyeoquenda tupri judío rerecuareta sui ore siquiyepave. Ahese Jesús oi que ore pñhuve. Ore mboavirave.

—¡Peico tupri! —ehi oreu.

²⁰ Aipo ohe pare, omboyecua opo, oique avei oreu. Ahese orerorivete yande Yar repiase oroico. ²¹ Ipare aipo ehi iri:

—¡Peico tupri! Inungar che Ru che mbou, ãgüe ahe aveira co che pëu —ehi oreu.

²² Ichui ore peyu:

—Peipisi Espíritu Santo —ehi—. ²³ Peñeroise que ava upe, ahese ahe oipisira ñeroisa; napeñeroise rumo que ava upe, ahe evocoyase ndoipisii chira ñeroisa —ehi oreu.

Tomás osepia yande Yar icuerayevise

²⁴ Ñepeí ore mboetasa rumo Tomás icõí vahe, ndipoi eté ore pãhuve Jesús oyemboyecuase oreu. ²⁵ Ipare ore aipo orohe chupe:

—Orosepia yande Yar —orohe.

Tomás rumo aipo ehi:

—¡Too! Acoi asepiase voi eté quiravo cuarer ipo rese iyavei amoinguese che cuã quiravo cuarer pipe iyavei amoinguese che po yique cutu agüerve, ahese ramo aro-yara —ehiño oreu.

²⁶ Ocho ari pare, ore oroñemonuha iri oi pipe oroico. Aheve ramo Tomás secoi ore pãhuve. Yepe oroyeoquenda tupri ité viña, Jesús rumo oiqueño ité ou ore pãhuve, ore mboavirave aipo ehi:

—¡Peico tupri! —ehi oreu.

²⁷ Ipare aipo ehi Tomás upe:

—Esepia che po, emoingue nde cuã quiravo cuarerve; embou ave nde po, emoingue avei che ique cutu agüerve. “Tachequerẽhi eme seroya ãgua” nderei chira cheu; ¡che reroya eve! —ehi.

²⁸ Evocoyase Tomás aipo ehi:

—¡Che Yar Tũpa! —ehi chupe.

²⁹ Ahese aipo ehi Tomás upe:

—¿Cūrítei che reroya che repiase eve cute? ¡Aviye catu ava che repiaēhi pipe che reroya vahe! —ehi chupe.

Co icuachiapri Jesús reroya āgua

³⁰ Jesús oyapo setá ambuae poromondiisa ore rovaque. Ahe rumo ndaicuachiai co cuachiar pipe. ³¹ Co rumo aicuachía ‘toviroya Jesús, Poropĩsirosar, Tūpa Rahir secosa; ipipe tovireco tecovesa yuvireco’ che yapave.

21

Jesús oyemboyecua siete güemimbohe upe

¹ Ore sore ivi Galilea ve, Jesús oyemboyecua iri oreu ipa Tiberia ve. ² Ahese oyeseve Simón Pedro yuvirecoi, Tomás ahe acoi icōi vahe, Natanael, ahe aipo tecua Caná pendar ivi Galilea rese, ñuvirío ore Zebedeo rahir oroico vahe iyavei ambuae ñuvirío Jesús remimbohe. ³ Simón Pedro aipo ehi:

—Asora pira mboha —ehi.

Ore avei aipo orohe:

—Toroso nde rupi —orohe chupe.

Orosoño, oroha carite pipe. Ahe pĩtu pipe rumo ndorombohai eté pira. ⁴ Cōhe potase rumo, Jesús oyemboyecua imbehi ivii. Ore rumo ndoroicuai eté Jesús secose. ⁵ Evocoyase aipo ehi oreu:

—Mbia chíhivahe, ¿ndapembohaimi eté pira? —ehi.

—Aní eté —orohe chupe.

⁶ Evocoyase aipo ehi:

—Pemondo pira mbohasa ive pe asu coti. Ahese pembohara —ehi.

Ēgüe orohe, ipare voi, “¡Too!” orohe, ndorovinose catui eté ipi sui pira mbohasa oroico. Esepia, savapipo tupri ité pira ipipe. ⁷ Evocoyase che, sembiaisu, aipo ahe Pedro upe:

—¡Yande Yar niha evocoi! —ahe.

Pedro che ñehe rendu ramoseve voi, omonde oturu-
 cuar. Esepia, yipindar nani secoi; opo ive oso chupe.
⁸ Ore evocoyase oroviroyepota ité carite ndatipiimisave,
 oroichoho pira rehii imbohasa pipe seraso, cien metro
 tēi oroico imbehi sui. ⁹ Orovinosese ivi ātasave, orosepia
 tātapii harive pira, pan reseve.

¹⁰ —Peru moviro evocoi pira penose ramo vahe —ehi
 oreu.

¹¹ Evocoyase Simón Pedro oha carite pipe, oichoho
 ndatipiisave pira guasu rehii imbohasa pipe, ciento cin-
 cuenta y tres tupri; yepe setá viña, imbohasa rumo
 ndosoroi eté. ¹² Evocoyase aipo ehi:

—Perio, tapecarumi rane —ehi oreu.

Ndipoi eté que ñepeí ore pāhuve “¿ava vo nde ereico?”
 ehi vahe chupe. Esepia, oroicuaño ité yande Yar secose.
¹³ Chupe ore sore, oipisi pan, ombou oreu, ēgüe ehi avei
 pira imbou oreu.

¹⁴ Co rese Jesús oyemboyecua mbosapi rupi oreu ocuer-
 ayevire.

Jesús osecoaña Pedro

¹⁵ Ore caru pare, Jesús oporandu Simón Pedro upe:

—Simón, Juan rahir, ¿che raisu catu ité eve co mbahe
 sui? —ehi.

—Taa, che Yar, ereicua niha che nde raisusa —ehi Pedro
 chupe.

—Ndehañeco tupri ru catu che reroya ramomi vahe
 rese yuvireco —ehi.

¹⁶ Imoñuviriosa rupi oporandu iri chupe:

—Simón, Juan rahir, ¿che raisu catu ité eve? —ehi.

—Taa, che Yar, nde ereicua che nde raisusa —ehi Pedro
 chupe.

—Evocoyase esãro tupri che reroyasar yuvireco —ehi.

¹⁷ Imombosapisa rupi oporandu iri chupe:

—Simón, Juan rahir, ¿che raisu vo eve? —ehi.

Aipo oyeupe hese, Pedro ndoyembovihai eté aipo ehi:

—Che Yar, nde niha opacatu ereicua, nde avei ereicua che nde raisusa —ehi.

—Evocoyase ndehañeco tupri catu che reroyasar rese —ehi—. ¹⁸ Supi eté aipo ahe ndeu: nde chihivahe catu vitesé, ereyemonde vite nde ae, ereguata vite avei nde remimbotar rupi; nde cuacua catuse rumo, ereyeyivamoatara, ambuae evocoyase nde mboyemondera, nde reraso aveira nde so potaëhisave —ehi.

¹⁹ Jesús rumo omboyecua aipo ohe pipe mara ehira Pedro omano Tüpa mboeteisave curi. Ipape,

—¡Erio che rupi! —ehi Pedro upe.

Jesús remimbohe saísupri

²⁰ Che Jesús rembiaisu ité aico, che ité acoi carusa ipa vaheve yípive añ acoi aporandu chupe: “Che Yar, ¿ava vo nde mondora nde amotarëhimbar upe?” ahe acoi chupe. Aguatase Pedro raquicuei, oyemboyere che repia.

²¹ Ahese oporandu chupe:

—Che Yar, evocoi no, ¿mbahe oimera chupe? —ehi cheu.

²² Evocoyase omboyevi Pedro upe:

—Che aipotase secove vite ãgua che yevise nara, ¿mara vo nde ererecora viña? Nde catu, eguataño che rupi —ehi.

²³ Sese ambuae Jesús reroyasar ipihañemoñeta tēi aipo che namanoi chivaherã ité yuvireco viña. Jesús rumo ndahei ‘nomanoi chietera’ ohesave aipo ehi cheu; ahe rumo, “Aipotase secove vite ãgua che yevise nara, ¿mara vo nde ererecora viña?” ehi.

²⁴ Che ité amombehu co mbahe, che avei aicuachía iyavei yaicua supi tupri vahe ité che remimombehu.

²⁵ Oime avei ambuae mbahe setá Jesús rembiapo, que opacatú icuachiasase viña, ndiyai chietera revo ivi viña. Aipo rupive.

Tüpa Ñehengagüer

New Testament in Guarayu (BL:gyr:Guarayu)

copyright © 2011 Wycliffe Bible Translators, Inc.

Language: Guarayu

Translation by: Wycliffe Bible Translators, Inc.

Guarayu [gyr], Bolivia

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guarayu

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25
